

SINGVLIER


SECRETS ET SECOVRS CONTRE LA PESTE, SOVVENTESFOIS EXPE- rimétez & approuuez, tât en certaine preservatiõ que parfaicte guarison.

Par M. Antoine Mizauld Medecin à Paris.



A PARIS,
Pour Mathutin Breuille, demourant en la rue S. Iaques,
à l'enſeigne du petit Croissant, deuant le
College de Marmoutier.

^{1 5 6 2.}
AVEC PRIVILEGE.



EXTRAICT DV privilege.

IL est defendu a tous Imprimeurs, libraires & porte pan-
niers de ce Royaulme, sinon à Mathurin Breuille, d'impri-
mer ou faire imprimer, vendre ne distribuer le present li-
vre, intitulé. *Singuliers secrets & secours contre la peste-souven-
tes fois expérimentez, et approuvez, tant en certaine preservatiō que
parfaicte guarison.* Et ce iusques au temps & terme de six ans
ensuinās, & commençans de la date de la presente impres-
sion: si ce n'estoit par le congé & consentement de l'auteur,
& dudit Breuille. Sur peine de confiscation des livres, & a-
mender ainsi que plus à plein il est conteou au Privilege, qui
fut outroyé à Paris le vij. iour d'Aoust, mil cinq cens soix-
ante & deux.

Signé.

CAMVS.



A TOVS QVI DESIRENT
santé d'esprit & de corps,
Ant. Mizauld presente
Salut.



*M*is, puis qu'il plaist à
l'inscrutable conseil &
iustice de nostre Dieu tout
puissant, que telles esmeu-
tes & guerres soient au-
iourd'huy excitées en ce desolé Royaume
de Frâce, que iamais ayent eslé veues, ouies,
ou escriptes, guerres di-ie (belas) tant spi-
rituelles que corporelles, ie me suis aduise, à
fin de n'estre reputé oisif entre tant de cou-
rageux personnages qui trauaillent pour
le bien public, de choisir pour ma petitesse
& corpulence quelques armes desquelles ie
me puisse ayder, pour la tuition & defense
de ma pauvre patrie. Laquelle chose pen-
dāt que ie propose mettre du dict au faict,

Et en bonne executiō, ie suis incontinent ad-
 uerti qu'un furieux, violent, tresdāgereux
 Et pestilent ennemy faiēt courses, son-
 ne alarmes, Et donne assaulx insupporta-
 bles à plusieurs villes Et bourgades de no-
 stre Royaume, Et signamment à ceste in-
 comparable ville de Paris. Pour l'expugna-
 tion duquel pourautant que ie vois peu de
 gens se mettre en campagne, s'armer Et fai-
 re saillies, i'ay prins conseil Et courage sur
 le champ, de luy faire frōt Et resister, selon
 ma petite force Et capacité. Ensemble mō-
 strer à ceulx qui voudroiet suyure mon en-
 seigne, Et venir au son du tabourin, par
 quelles armes, moyēs Et aides ilz se pour-
 ront facilement preseruer Et garder, ie ne
 diray des approches dudiēt pestilēt enne-
 my, ains de ses surprinses, assauts Et tou-
 ches. Et quand bien il aduiendrait qu'on
 tōbast entre ses mains, Et qu'on fust faiēt
 son prisonnier, par quelle rancon, payement,

ou bien ostages, on se pourra redimer. Laquelle chose si i'entreprens en la presence de tant de vaillāns, experts & braues Capitaines qui sont notāment en ceste Ville de Paris, & ailleurs (desquelz ie ne seroys digne porter l'espee, ou bouclier) ie les prie tresaffectueusement la prendre en bonne partie, & me pardonnant, la supporter, regardant le cueur & vouloir dōt procede telle entreprise, de laquelle ie ne pretens autre recompense, qu'une gracieuse bienueillance. Voyla mes amys, les deux ennemys, guerre, die, & peste, desquelz il plaist à l'indicible bonté de nostre Dieu nous affliger, par noz trop enormes fautes, & cueurs à luy desobeir par trop long temps endurciz. Prions le ie vous supplie, hélas, prions le qu'il ne nous enuoye le troisieme ennemy plus outrageux, insupportable, cruel & impitoyable que les deux precedēs. C'est famine, mes amys, laquelle nous voyōs ia frapper à noz

portes, & furieusement nous menacer: si ce bon Pere de pitié, de toute consolation & misericorde ne la destourne, ayant compassion de nous. Ainsi qu'il aura, si nous adhérons à luy, & faisant ses commandemens amendons noz vies, de long temps depravées. Ainsi soit il, & à Dieu.

A Paris le Viii. Aoust. 1562.

AD ANTON. MIZALDVM,

pestiferi monstri domitorem plus quàm Herculeum,

I. P. Doctoris medici.

ὁμοιοτίλευτα.

Alcides sæuam ferro & face contudit Hydram:

Tu rebus medicis, Hercule maior eris.

Alcides aliquot populos hac peste leuauit:

Tu totas genteis, Hercule maior eris.

Alcides claua repulit quodcunque venenum:

Tu calamo pulsas: Hercule maior eris.

Alcides fuit hinc astrum: super astra vehêris

Ter foelix, & sic Hercule maior eris.

ἐν πόντῳ τὸ κλέος.

LIVRE PREMIER DES
SINGVLIERS SECOVRS CON-
tre la peste, proposez par M. Antoine
Mizauld, Medecin à Paris.

POUR AVTANT qu'il est beaucoup plus louable de pouuoir euitier vn dāgier eminent, que prédre cōseil d'en sortir apres y estre cheut: & trop plus excellent de pouuoir facilement coupper le chemin à vne fort dangereuse maladie, qu'estāt surpris d'icelle chercher les voyes & moyēs d'ē sçauoir eschapper & guarir, pour ce est-il, que ie me suis icy aduisé d'ēcripre & mōstrer en premier lieu les aides, moiens & armes par lesquelles vn chacun se pourra aisement preferuer & deffendre des furieuses cour-

ses & assaults que la peste faict & donne quasi par tout, ceste année 1562, deuant qu'entrer de premier vol aux remedes & secours propres pour se sauuer estant cheut entre ses mains, & frappé de son dart mortifere & violent. Delaisant d'ocques, pour briefueté, les diffinition, causes, signes & descriptiōs de peste, amplement cōtenues en noz cinq petits liures latins (lesquelz Dieu aidant nous mettrōs bien tost en lumiere) ie prendray le plus court & facile chemin que ie me pourray aduiser, pour familièrement & populairement enseigner de se pouuoir preseruer & garder d'estre surpris ou frappé de ladiete peste. Cela faict, ie donneray les moiēs d'en guerir, ou il aduiendroit qu'on en fust attainct & touché, Vous promettant ne rien escrire, ou bien

peu,

peu, qui n'ayt esté approuué, ou par moy, ou par mes amys, grands experimentateurs des choses naturelles, & de bon iugement, accompagné de pareil sçauoir. Retrêchant doncques trop long proëme, ie commenceray en ceste sorte.

*Comme generalmente vn chacun se peut
preseruer & garder de peste, & quels
lieux il fault choisir pour bien ha-
biter en temps pestilentieux.*

LE premier remede & seul preser-
uatif de peste, est se retirer à Dieu
tout puissant, & d'une affectionnée
volonté & ardētissime cueur le sup-
plier par le moyen de son bien-aimé
filz IESVS-CHRIST, & intercession
des saints, vouloir appaiser son ire cō-
tre nous, & retirer son glaue pesti-
lent duquel par noz demerites iuste-
mēt il nous persecute, comme il fait

son fidele seruiteur Daud.

Cela faict, deslors & incontinent que vous orrez quelque bruit de peste au lieu ou vous ferez, ne differez trousser voz quilles, & tost vous enfuir, & bien loing, afin de n'estre surpris de la beste pestilente, qui va autāt nuict que iour, & plus viste qu'un chat maigre.

Fauldra reuenir biẽ tard, lors qu'on entendra ladite male beste auoir esté sopie & amortie.

Sur tout il fault auoir bon cueur & fort courage, ne s'effrayant ou esbaïssant en riẽ: & mettre toute crainte dehors, qui biẽ souuent cause desespoir, accompagné de telle maladie par forte imagination, impressiõ & apprehension, ainsi que nous auõs veu aduenir à plusieurs. Parquoy il est fort bõ s'asseurer, & boire du meilleur,

leur, mais sans excès.

Ne fault souffrir aucunes putrefactions & superfluitez d'humeurs regner en soy : ains se purger & nettoyer d'heure: par le cōseil d'un doctre & sage medecin.

Vser soirs & matins de quelques remedes preseruatifs, tels que nous les descrirons cy apres: & allumer esdits temps feux de bois & plantes odoriferantes, ou bien exciter parfums tels que nous enseignerons: & souuent changer de linge blanc.

Sera bon se tenir en sa maison & ne sortir que le Soleil ne soit haultement leué, ayant en main quelques odeurs, & en bouche quelque antidote de ceux que nous produirōs cy apres, ou autres.

Se fault garder des rayōs de la Lune, comm' aussi du Soleil, & ne dor-

mir foubz l'un, ou foubz l'autre, ne faire grand exercice, & ne sortir de fa maison le Soleil eftant ia couché.

Fault ſ'abſtenir de la conuerſatiō & colloque de ceux qui ſont, ou ont eſté malades, ou biē viēnent de lieux infectz & peſtilentieux.

Nē prendre logis pres cemitieres, voiries, boucheries, eſcorcheries, poiſſōneries, cloaques, & autres lieux puants & immundes.

Tenir ſa chambre nette, & y reſpādre herbes & fleurs odorātes, les chāgeant & renouvelant deux fois le iour.

Vſer de veſtemens & linges bien nets, & tenuz en coffre accompagné de bonnes ſenteurs & odeurs: & ne nourrir chiens, chats ou volaille, au mois qui trotte par rue, ou maiſons.

Ne ſouffrir fiens pres de ſoy, n'aufſi
ſi vſer

si vſer de chairs, poiſſons, herbes, ou fruitſ pourriz, & ne menger pain moiſi, ne boire eaux ou vins tournez & corrompuz.

Ne loger pres de peaulſiers, cor-roieurs, chandeliers, chaircutiers, rauaudeurs, pelletiers, frippiers, reuendeurs, fauctiers, repetaſſeurs, & ſemblables immundes, ords & viles arti-fants.

Ne nourrir pres de ſoy pourceaux, pigeons, oyes, canars, & ſemblables oyſeaux, n'auiſi retenir eaues croup-pies, ou autres excremēts, quels qu'ils ſoient, & ne faire ſon vrine par les rues en lieux ou ſe rendent excre-ments.

Quant aux logis & habitations, fault qu'elles ſoient ſituees & ouuer-tes à vents contraires de ceux dont vient ou regne la peſte : & ſur tout

n'habiter en lieux bas, humides, boueux, marécageux, puants & accompaignez de gros air, n'ayant aucũ esuentement.

Fault choisir lieux descouverts du costé de la bize & vêts septétrionaux, comme aussi oriétaux : plus tost que meridionaux & occidentaux.

Fermer & estoupper tant portes que fenestres aux susdicts deux derniers vents, & ne partir de son logis en temps nubileux, pluuieux, & vent de midy ayant cours.

Se loger en lieux desquels on ne puisse ouyr pleurs lamentables & desolatiõs des malades, ou parents, voisins & amys d'iceux, n'aussi sons de cloches ou clochettes pour trespassez & choses semblables, lesquelles souuent donnent frayeur, & debilitent ou esbranlent le cueur & coura-

ge des infirmes, timides & peu asseurez: comme peuuent estre femmes, tât grosses qu'autres, avecques vieilles gens, enfans & plusieurs autres.

Quelles personnes entr'autres, se doivent garder en temps pestilent & dangereux.

TOus ceux premierement qui sont preparez & ont le corps infect, plein de pourriture & mauuaises humeurs, & pour ce regard symbolisât avecques le poison pestilent.

Qui ont le cuir mollet & les conduictz ou souspireaux d'iceluy rares & ouuers, comme ceux qui facilement suent, s'accoustument à bains d'eaus douces, & exercices moderez.

Gens sanguins, chauds & humides le plus souuent enclins à ieux veneriques, & putrefaction d'humeurs.

Ieunes enfans & filles, ausquelles

les fluxeurs menstrues, improprement nommees fleurs, commencent a s'escouler & produire.

Ceux qui ont la chaleur naturelle imbecille, & la substance des esprits, & facultez du corps fort fragiles. Sèblablement qui se passionnent, troublent, ennuyent, despitèt & desplaisent pour neant.

Qui s'exercent violentemèt & outrageusemèt iusques à grande sueur, & crièt ou chantèt a voix desployée, mesmemèt en lieu & temps suspect.

Qui sont subiects à maladies, ou relient d'icelles : cōme aussi tous ulcerez, verollez, farcineux, puants, im-mundes & cacochymes.

Qui habitent avecques barbiers, chirurgiens & medecins des pestez, prebstres, fossoyeurs, gardes qui traitent, visitent ou enterrent les pestifercz,

ferez, gens gourmâts, qui viuent intemperamment, auaritieux sordidement, & pauures tellement quellement de ce qu'ils trouuent.

Ceulx qui habitent en lieux marécageux, cloaqueux, cadauereux, puantz & ordz, & portent vestemens immundes & pourris. Tous craintifs, effraiez & descouragez; qui au son d'une clochette, & nouuelles des morts, ou chants funebres, sont esperduz & à demy enterrez.

Secours & aydes pour ceux qui sont contraincts voyager & negocier en lieux suspectz & dangereux: & aussi pour tous autres.

A Pres les choses premieres & generales qui sont requises en cest affaire, comme peuuet estre purgatiōs & vacuatiōs faictes en temps & heu-

re, par le conseil & ordonnance d'un docte & sage medecin, il est bon & prouffitabile vser de l'antidote & cōtrepoison du Roy Mithridates, tant louée & approuuée des anciens medecins Grecz & Latins. Laquelle Pōpée le grand apres l'expugnation du dict Roy trouua à son sanctuaire & cabinet escripte de sa propre main: iacoit que Galien la semble attribuer à un nommé Apollonius Muris. L'antidote non moins facile qu'utile se fait ainsi.

Prenez { Vingt fucilles de rue,
Deux noix,
Deux figues,
Vn grain de sel.

Pilez tout ensemble & en vsez sans autre mistion, ou avecques vn peu de bon vin blanc incontinent que vous serez leué au matin. La susdicte
com-

cōposition pourra seruir pour deux prinſes, & ſ'augmentera comme on voudra. Auiourd'huy pluſieurs y adiouſtent vn bien peu de bon the-riacque avecques du ſyrop de citrons ou limons, & reduiſent le tout en forme d'electuaire ou oppiate; ce que ie trouue tresbon, & le loue merueilleuſemēt, & ſi conſeille d'auātagē à mes amys familiers y adiouſter quelque portion de bon bole d'Armenie preparé (lequel on nōme vulgairement boliameni) ſil ſ'en pouoit trouuer de legitime tel que ie l'ay recouuert à grande difficulté & fort bien experimenté; comme ſça-uent pluſieurs.

Les pilules communes, autrement dictes contre la peſte, ou pilules de Rufus, ont merueilleuſe efficace en ceſt endroit, deſquelles nous eſcrip-

rons cy apres la composition.

On pourra tous les matins succer vne rostie trempée en bon vin blanc auquel toute la nuit aura esté en infusion quelque portion de la racine d'Angelique, moult excelléte en tel affaire. Et la reste dudit vin sera fort bone à lauer le visage, le col, les mains & artères des bras.

Ladicte racine aussi tenue en la bouche est merueilleusement prouffitabile & recommandée en tel affaire. Comme aussi celle de citouar, gétiane, enula campana, & semblables.

Il est fort bon tenir en sa main vne pomme de citrons, limons ou aurengiers, estât lardée de cānelle ou clouz de girofle, la chageant pour le moins deux fois le iour & appliquant souuent au nez. Celle qui sera changée seruira fort bien à faire saulse, & l'es-

corce à porter & tenir en la main.

Si voulez vser du ius desdictes pomes, avec succre & eauë rose, y trempât vne bouchée de pain, vous aurez vn souuerain remede preseruatif, si le prenez deuant que sortir du logis, & à ieun.

Quelque petite portion de bon & ancien theriaque ou mithridat, prise en hyuer toute seule, en esté avec eauë rose, ou vinaigre rosat, ou eauë de buglosse, d'ozcille, ou d'endiue, est chose plus que louable, pourueu que on ayt du vray & bon theriaque ou mithridat qui sont bien rares en ces pays.

Porter en sa main, vne esponge abreuée de bon vinaigre faict de rue, estant si fort expreinte ladicte esponge, qu'il n'y demeure que la senteur, chose fort singuliere, & beaucoup

plus si vous y adioustez vn bien peu de safran & camphre.

Il est aussi fort bon auoir sur soy quelque bonne pomme de senteurs telle que nous la pourrôs descrire cy apres: comme aussi pouldres semblables & souuent l'accômoder au nez.

Ne fera aussi inutile tenir en vn mouchoir ou lige fort rare, des fueilles de laurier qui aurôt trépé la nuit en eau rose cannellée, ou bõ vinaigre rosat, ou eau de senteurs telle que nous la descrirons.

Les pauvres se contenteront lauer leur faces & mains de bon vinaigre, ou sera dissout vn peu de theriaque cômune: ou bien ilz tiendrôt en leur main vne brâche de rue. Ce qu'aujour d'uy mesieurs les Parisiens ont en singuliere cômendation: mais ie leur voudroye volûtiers cõseiller d'y ad-
iouster

iouster quelques fucilles de laurier, faulge, baulme, melisse, rosmarin ou mariolaine, pour les causes que i'explique ailleurs. Ou bien prendre la rue qui croist souz vn figuier, laquelle singulieremēt recōmande Dioscoride: voire (qui sont choses notables) iusques à en vser aux potages, & non d'autre. Ce qu'aussi font Plutarque & Pline, monstrans la grande sympathie, accord & amitié qui est entre le figuier & ladiète rue. De sorte que si vous la plantez soubz le figuier, vous la voirrez plus proufiter, mieulx se nourrir & croistre qu'en autre lieu quel qu'il soit, ainsi que vous congnostrez par facile experience. Parquoy n'est de merueilles si Mithridates en son antidote & contrepoison, la voulut adiouster & ioindre avec la figue. Qui pl'en desirera lise

noz secretz des Iardins. Quoy qu'on dise, ie conseille aux femmes vser de ladiète rue sagement & avec bon cōseil, soit en temps de peste, ou autre, pour les inconuenientz que i'en ay veu aduenir plusieurs fois. Entre autres ie vois ceste presente année ceulx qui la portent & ordinairement flairent ou sentent, auoir le visaige comme enflambé & rouge, quelque fois vlceré. Les causes sont en nosdictz secretz des Iardins. Mais voirement il semble que ie sorte hors de chemin: pour dōc y retourner & le reprēdre, ie dy que quelques branches de rue trempées vne nuit en bon vinaigre sont fort bōnes pour se defendre de mauuais air pestilent, pourueu que souuent on les presente au nez, & qu'on y adioust choses vn peu plus odorantes, pour recreer les espritz,

qui desdaignent choses mal plaisantes, grains de geneure auront vn mesme effect , tenuz en la bouche , machez & auallez avec vn peu de bonne cannelle . Semblablement trois ou quatre fueilles d'ozeille trempées en bõ vinaigre rosat, & prinſes le matin à ieun , avec vn clou de girofle: qui est chose fort esprouée.

J'ay conſeillé à aucuns faire amortir & cuire ſoubz cédres chaudes les dictes fueilles ainſi trempées, & en meilleure quantité, eſtantz enucloppées dedans vn papier , ou eſtoupes, puis en exprimer le ius , & avec fin ſucce le boire au matin . Laquelle chose leur a eſté comme vn miracle: car allantz & venantz par lieux dangereux ont eſté ſans aucune contagion: depuys i'ay aduiſé & experimé té qu'il eſt tresbõ y adiouſter le groz

d'un poix de bon theriaque.

Quelques laboureurs par mon cōseil ont adiousté au lieu de sucre peu de suc de rue, & ont esté non seulement preseruez, mais aussi frappez de peste guariz, appliquantz sur la bosse par diuerses fois le mag de la dicté ozeille ainsi amortie, avecques huile rofat & de camemile, le tout pilé ensemble & mis chauld sur peu de laine à tout son suif, puis appliqué comme dessus.

J'ay veu semblables experiēces par plusieurs fois des fuçilles de foulcie, & plâtain ainsi prinçes & appliquées: sinon qu'aux charbons ie faisoys adiouster & piler avec le plantain ainsi préparé que l'ozeille, huylle violat, ou deliz, ou beurre fraiz. Et vous aduise que pour herbes vulgaires & iardinieres vous n'en auez de plus excellent-

cellentes en tel cas que cestrois, & ne y veux excepter la scabieuse, tant recommandée des anciens & modernes. I'espere que qlques vns me sçauront gré de telz secretz bien experimentez. Si on veult seulement boire le ius desdictes herbes, sera fort bon, en y adioustant vn peu de sucre, cannelle ou miel.

Je proposeray encores vn remede preseruatif & singulierement curatif le cas aduenant qu'on fust frappé. Il fault prendre quelque peu de semen & fueilles de rue, avecques vne vielle noix ou deux, & piler le tout avec bon vin blanc, puis le passer, & boire à ieū. C'est chose esprouée & digne d'vn grand merci pour le moins.

Autres singularitez & remedes pour ce regard se declaireront cy apres: vous aduisant que ie ne propo-

se gueres choses , cōme i'ay dict, qui n'ayent esté experimentées par moy ou mes amys , qui ont discouru par pays,accompaignez de bōnes lettres, & excellent iugement.

*Comme on doit purifier & corriger l'air
des chambres & logis, tant de ceux
qui sont sains que frappez.*

POurautāt que l'air est vne des premieres choses requises & necessaires pour la cōseruation de la vie,veu que vueillōs ou non,en quelque lieu que ce soit , il le nous conuiēt attirer & retirer, tant bon que mauuais, par le moyen & ayde des poulmons & imperceptibles ouuertes de petites arteres semées parmy le cuir de tout le corps,qui puis en apres (tellement quellement estant alteré) le communiquent & enuoyent au cœur fontaine & fondement de la vie,& derechef

chef iceluy le distribue à toute l'œ-
 conomie du corps: comme font les
 narilles au cerueau, à ceste cause il
 est tresnecessaire & fort conuenable
 en temps de peste (qui communémēt
 participe de corruption & imperce-
 ptible alteration d'air) corriger, pu-
 rifier, & amander ledict air: signam-
 ment en temps sombre, pluuieux &
 nubileux: ce qu'on fera

par feuz allumez,
 par fumigations ou parfuns,
 par caues, fleurs, fueilles tant
 d'herbes qu'arbres, en la façon
 que nous dirons.

Les feuz en hyuer & temps froid
 seront cōposez de bois & plantes de
 bōne odeur, & qualité chaulde, cōme
 de geneure, cypres,
 laurier, rosmarin,
 aspic, mirte, saulge,

baselic, baulme, thyn,
 origan, calamenthe,
 mariolaine, serpouillet,
 hyssope, fenoil, sarriette,
 & semblables soyent verdes
 ou seiches.

Les parfuns ou suffumigations se
 feront audict temps sur vn rechault,
 ou charbons ardantz au milieu de la
 chambre: sur lesquelz on iettera

grains de geneure,
 de laurier, fenoil,
 bois d'aloé, du ladan,
 benioin, cannelle,
 cloux de girofle, myrrhe,
 noix muscade, mastix,
 aloé, ionc odorant,
 safran, escorce de citrons,
 racine d'angelique,
 de fouchet, de flambe,
 oyseletz de cypre,

& choses semblables en prenant telle quantité qu'on voudra des vns ou autres.

Quât aux caues, fucilles, fleurs & rameaux propres pour corriger l'air en temps pestilent hybernal, elles doiuent estre extraictes des arbres, plantes & herbes n'agueres descriptes pour faire feuz. Lesquelles fauldra respendre parmy la chambre, ou biẽ l'arrouser de la decoction d'icelles, estant vn peu tiede.

Aux grandes chaleurs regnant peste & air contagieux, aucũs medecins ont defendu feuz, de paour d'augmenter la chaleur, tant interne qu'externe, & eschauffer d'auantage ledict air: lequel plus tost conuiendroit rafraichir comme aussi les espritz & humeurs des corps bouillantz & bruslantz pour lors. Parquoy en lieu de

feuz, est bon vſer de parfuns & fumigations faiçtes de choſes qui refraiſſent & ſont de qualité froide ou tempérée: comme

de fleurs de violettes,
 de nenuphar, de roſes,
 de concombres, courges,
 pepons, melons, citrons,
 limons, oranges, grenades
 ou leurs eſcorces,
 de chamemile, melilot,
 trochiſques de ſpodic,
 de camphre ſantaulx,
 ſemence de geneure,
 maſtix, ladane, encens,
 terebinthine, beniouin,
 & ſemblables, en telle quantité
 qu'on voudra, & de qui bon
 ſemblera.

Des fleurs, ſucilles & eſcorces ſuſdictes ſe pourront faire decoctions
 d'un

d'un bouillon ou deux seulement:
de laquelle refroidie & rafraichie en
eau de puis, seront arrosez les pa-
rois & pavez de la chambre, y adiou-
tant (si bon vous semble) eau rose &
vinaigre.

Les pauvres pourrôt vser de fueilles
de laiëtues, d'ozeille,
de pourpied, plantain,
de vigne, iombarbe,
de faulx, peuplier,
de ronces, violettes,
mauues, nenuphar.

& semblables, trempées & re-
fraichies en eau de fontaine, &
bon vinaigre, puis respandues
parmy la chambre.

*Pomme de senteurs ou patenostres qui
se portent pour corriger l'air pe-
stilent inspirable.*

IL n'y a celuy qui ne confesse que les espritz & facultez des corps humains, ne soyent soudain reparez, & aydez par bonnes odeurs, & offensées par mauuaises. Donc pour les soustenir, recréer & restaurer, comme aussi leur substance estant facilement offensée par infection d'air pestilent, nous descrirons presentemēt & succinctement vne compositiō de pommes de senteurs, propre pour les effectz susdictz : mesmes en temps chauld, auquel communemēt regne peste & corruption, ou alteration d'air.

Prenez	{ de roses rouges, fleurs de violettes, & de nenu-phar,	{ de chaf. vn once.
--------	---	------------------------

de

CONTRE LA PESTE.

	{ de tous sentaux, cānelle, mirrhe, mastix, oliban, bois d'aloé, bēioin racine d'angeli. & de bō fouchet, poudres de violettes—i.dr. ambre gris choisy—xv.gra. cāphre naturel—demy scru. musch, nō adult.—vj. graīs,	{ de cha. ij.drac.
Prenez		

Le tout soit subtilement puluerisé & incorporé, avec bon tragacathe destrempé & resoult en eau rose, y adioutant du ladane, & bōne therebē tine, si besoing est, ou huyle d'aspic, & en foyent formez globes, ou pate- nostres en figure & quantité qu'on vouldra.

En tēps hybernal & froid se pour- ront composer semblables artifices des choses escriptes pour les parfuns

en tēps froid, y adiouxant du musc d'auantage.

*Pouldre de senteurs pour le
mesme effect.*

QVi ne voudra cōposer pommes odoriferentes, pourra prendre les susdictes choses puluerisfées subtilement, & les mettre en vn sachet de taffetas, lequel il portera avec soy l'approchāt souuent du nez, ou l'appliquant sur la region du cœur.

*Chandelles, cierges ou torches de senteurs,
pour parfuns voyageurs quand on va
de chambre en chambre, ou bien
visiter malades, ou à ses
affaires par ville e-
stant nuict.*

DEs mesmes pouldres se pourrōt aussi faire & composer chandelles, torches, ou cierges pour parfuns, les incorporāt & meslant avec cire neufue,

neufue, & luminons ou mesches de cotton, en telle quantité qu'on voudra. Et seruiron t lesdictz luminaires grandement & profitablement quād on ira visiter malades pestiferez, les tenant deuant soy d'une main, & de l'autre sa pomme de senteurs, & en la bouche quelque chose defensiue, c'estās les fenestres ouuertes, & bon feu luyfant en la chambre du malade: on s'en pourra aussi ayder en allant parmy la ville de nuict, ou de chambre en chambre.

Sachet ou escusson propre pour conforter

& roborer le cœur contre l'air infect, ou maladie pestilente.

POurautant qu'en air pestilent & maladies cōtagieuses, il fault tous iours auoir l'œil sur la conseruation & fortification du cœur, comme de la principale piece du corps, il sera

bon que ie propose icy vn fâchet ou
 escuffon fortifiât lediët cœur: lequel
 s'apliquera droiëtëmët soubz la mǎ-
 melle gauche, & se portera tât le iour
 que la nuit: non moins estant profi-
 table aux sains que malades. Donc la
 composition en sera telle,

Pre- nez	{	de roses rouges,	{	de chaf.
		fleurs & violettes,		iiij. dra.
		& de buglosse.		
	{	de tous sentaux,	{	de cha.
		de coral rouge,		ij. drac.
		& de bõ podion		
	{	de cānelle, mastic,	{	de cha.
		mirrhe, encens,		i. drac.
		& bois d'aloé.		de cha.
	{	de raci. d'angeli. &	{	i. dra. &
escorce de citrõs,		dem.		
	de bon cāphre—xii. grains.			
	de safran orient.—vi. graīs.			

Le tout pillé & puluerisé comme
 il

il fault,serà mis dedans vn sachet ou escusson de taffetas incarnat,ou quel que beau linge blanc, & bien douillet, qui representera la figure d'un cœur,& seront les pouldres retenues en iceluy par coustures croisées & fenestrees en forme de treilliz: & ledict escusson appliqué cōme dessus.

Epitheme ou application moitte.pour fortifier & conforter ledict cœur.

VOUS pourrez faire des drogues susdictes vn epitheme,ou application liquide & moitte, les faisant tremper, puis donner vn bouillō ou deux,& les couler par quelque linge, & en la decoction, tremper vn autre linge bien net,lequel estant espreint fera appliqué tiede sur la region du cœur,& chāgé par fois si besoing est.

Aduertissement digne de noter.

POurautant que tous corps (comme a dict nostre bon pere & grand docteur Hippocrates) sont par tout & en tout transpirables, ouuers & fluxiles, il sera bon & vtile en temps pestilent & air contagieux, de munir & fortifier les parties exterieures desdictz corps: afin qu'elles se puissent defendre contre l'air infectionné, lequel (comme nous auons dict) fault qu'elles reçoient & attirent ribonribaine & tout en despit d'elles, si gnamment celles qui ont conduictz & souspireaux patentz & descouuertz: ainsi que la bouche, le nez, les yeulx & les oreilles: ou bien occultes & inuisibles, mais transpirables, comme le cuir du visage, col, mains & autres parties du corps descouuertes & exposées à l'air ordinairement nous enuironāt, qlque part que nous foyons.

soyons. Parquoy il est tresnecessaire
 ayder ausdictes parties, afin qu'elles
 ne reçoient, attirent & cōuoyēt de-
 dans le corps air infect ou pestilent,
 ains plustost le corrigēt par le moyē
 & ayde que nous leur donnerons.

Qui se fera lauant souuentefois le-
 dict visage, col, & mains de bon vin
 blac ou vermeil, meslé avec eauc ro-
 se, & vn bien peu de cāphre choisi. Et
 si lon y veult faire tremper racine de
 angelique, qui est fort suaue & odo-
 rante, sera tresbon, comme ausi y ad
 iouster peu de vinaigre rosat. En la
 bouche fauldra tenir quelque anti-
 dote de ceulx que nous auons des-
 criptz au commencement, & au nez
 avec le bout du doigt inserer vne
 goutte d'huile d'aspic, qui a merueil-
 leusement bon odeur, comme aus-
 si dedans les oreilles: ce faisant vous

roborer de vn mesme traict le cer-
ueau par le moyen de ladicte huile.

Ceulx qui seront peu douilletz & de-
licatz, ferōt beaucoup pour eux (qui
est chose experimentée) s'ilz veulent
oindre les arteres des bras, des tem-
ples, & du col, avec le gosier, l'orifice
d'estomach & region du cœur, de
bonne & vraye huile de scorpion,
comme il s'en faict en Prouēce: & en
pourront aussi instiller vne goutte-
lette dedās les narilles, & oreilles, qui
est chose non moins proufitable aux
malades que sains: ainsi que l'expe-
rience mere de verité l'a mille fois cō-
firmé. Je sçay hōme encōres viuāt qui
m'a iuré auoir esté gueri deux fois de
la peste, beuuant vn peu de ladicte
vraye huile (qu'il auoit apporté de
Prouence) meslée avec peu de vin
blanc, & avec laines chauldes, en ap-
pli-

pliquant sur la bosse. Qui sera chose merueilleable à ceulx qui ne veulent ou peuuent entendre qu'un venin ou poison souuentefois guerist & chasse l'autre, vray est que l'huile pourroit de soy exciter vomissemens qui avec soy attirent infinies putrefactions: mais les scorpiōs qui ont esté exteinctz & consummez en ladiēte huile, donnent la contre-poison. Et ne se fault de cecy trop esbahyr, veu que autheurs dignes de soy recitent aucuns auoir esté bien gueriz de peste ayantz vsé en sachetz propres, avec choses cordiales, d'orpeing & arsenic: appliquātz lesdictz sachetz sur le cœur: ou bien vn morcellet dudiēt arsenic sublimé, ou de tous deux, voire iusque à faire vlceres qui n'ont aucunemēt nuiēt: mais profité. Les autres ont vsé de poudre

de crapault brulé en vn pot neuf. Laquelle ilz ont aufsi avec vn fachel appliquée sur la regiõ du cœur. Aucũs ont aufsi vſé d'argent vif en la meſme maniere: mais ne ſ'y frotte qui voudra. I'ay conſeillé à pluſieurs vſer d'huile de geneure, qui eſt merueilleuſement odorante, au lieu de celle de ſcorpions (fort rare en ce pays) & ſ'en ſont fort bien trouuez & leurs amys, qui m'en remerciẽt de iour en iour, & en font leur proufit, non ſeulement en maladies peſtilentes, ains aufsi en pluſieurs autres, tant exterieures qu'interieures.

Voila quant à la rectification, correction & amendement de l'air en temps peſtilent, & de ſes remedes exterieurs: qui ne ſont de petite importance & conſequence: car d'eulx dependent toutes autres aides & remedes.

des. Reste venir aux aides interieures
preseruatiues & defensiues de cor-
ruption & pestilente contagion.

*Du manger & boire, tant de ceulx qui
sont sains que malades, en
temps pestilent.*

ICy i'escriray briefuement & en ge-
neral du menger & boire, tant de
ceulx qui sont sains que malades, le-
quel communément consiste
en pain, vin,
caue, chairs,
poissons, fruietz,
herbages,
& choses semblables. Lesquelles il
fault prendre moderément, sobre-
ment, en petitē quantité, & en heures
& temps: les choisissant & prenant
de facile digestion, nō corrompues,
ou corruptibles tāt dedans le corps,
que dehors iceluy. Et sur tout fault

auoir en singuliere commendation
 que toutes sortes de viandes & pota-
 ges foyent tousiours accompagnez
 tât le soir que le matin de ius ou suc
 d'ozeille, citrons,
 limons, oranges,
 verius de grain,
 ou vinaigre rosat.

Qui vouldra voir ample discours
 sur toutes les susdictes viâdes, le trou-
 uera en nostre liure latin: cōme aussi
 des exercices, beings, ius veneriques,
 & passiōs d'esprit & autres choses, qui
 doiuent toutes estre biē moderées &
 sans aucun excès, non seulement en
 tēps de peste pour preseruatiō, mais
 aussi en tout autre: ainsi que nostre
 bō ancien & venerable docteur Hip-
 pocrates a tresbien escript.

*Antidotes singuliers & contrepoisons
 interieures de peste.*

Puis

PVuis que nous auons par la grace de Dieu iusques icy tellement quellement monsté les voyes, chemins & moyens assez populaires & faciles de pouuoir par remedes extérieurs euader les menaces de nostre pestilent ennemy, reste maintenant proposer les armes par lesquelles on se pourra interieurement munir & defendre contre luy, s'il est par fortune recogneu ou rencontré faisant courses & rauages par pays.

— **D**onc il sera bon à vn chacun deuant que partir de son logis, auoir en main la masse non d'Hercules ce fort Lybien, ains du tresexpert medecin Rufe Ephesien. Je vueil dire, tenir tousiours preste sa composition de pilules, lesquelles sont vulgairement appellées pestilentiales, ou communes, dont la recepte en est telle.

Prenez { de bon aloé—demye once
 de mirrhe—deux drach.
 de mastich—demye drach.
 de safran—vi. grains. 3 2401

Le tout bien pilé & broyé s'incorpore avecq ius de citrons, ou syrop de limons, ou bon vin blanc en l'hyuer, & en est faicte vne masse, laquelle se garde soigneusement pour en verser quand nécessité le requerra. Il est vray que la cõpositiõ de Rufe n'a aucun safran, mais bien en son lieu de l'Ammoniac, lequel nous auons cõuertí en mastich, pourautant que le vray Ammoniac d'Alexandrie ne loge gueres chez noz apõtícaires, quoy qu'ilz vueillent dire.

Ces pilules sont de grãdissime efficace, & approuuées de toute antiquité contre le venin pestilent, corruption d'air, & putrefaction intérieure

ricure : car

l'aloe nettoye & purge,
la mirrhe purifie & resiste
à putrefaction.

le mastich robore & fortifie,
le safran resiouist les espritz,
& soustiét les facultez du corps.

Mais voirement il fauldra bien
prendre garde que les femmes nou-
uellement grosses, ou subiectes à vui-
danges, ou à trop grandes purgations
menstrues, n'en vsent souuent : com-
me aussi ceulx qui sont subiets à he-
morrhoides, & hemorrhagies, c'est à
dire à effusions de sang par parties
haultes ou basses. Pour lesquelz en cõ-
posant lesdictes pilules sera fort bon
lauër l'aloe avec caue rose en laquelle
aura esté dissoult du tragacant, & ce
tant de fois qu'elle aye perdu sa gran-
de amertumè qui ouurist les orifices

des veines, & excite fluxions sanguinaires. Ce que i'ay bien voulu icy aduertir pour les inconueniens que i'en ay veu aduenir.

La prinse & dose desdictes pilules, est vne drachme: de laquelle seront formées cinq ou sept pilules, qui se prendront vne fois la septmaine de grád matin: ou vne tous les iours quád on ira par pays. I'en ay congneu qui les faisoient dissouldre en vin blanc & caue rose, les aymans ainsi mieulx qu'en pilules, lesquelles ilz ne pouuoient deuorer.

I'ay coustume cōseiller à mes amys faire d'une drachme neuf pilules: & le premier iour en prendre vne, le troisieme trois, & le septiesme cinq: ou au contraire, le premier cinq, le troisieme trois, & le ciquiesme vne. De laquelle chose se treuuēt merueil
leu-

CONTRE LA PESTE.

Jeusement bien, pour les causes alleguées en nostre liure Latin. Aux iours entremoiés esquelz ilz ne prennent lesdictes pilules, ilz vsent le gros d'un pois de bon theriaque dissout en eau rose, ou d'ozeille, ou buglosse.

Autres pilules fort excellentes & experimentées de plusieurs, pour mesme effect, ou meilleur.

	d'aloé choisy—vne once.
	de bōne mirrhe—dem.on.
	de safran orient. —i.scrup.
	d'agaric. troch.—ij.drach.
	bōne rhabarbe—i.drach.
Prenez {	cānelle legitime—ii. scrup.
	mastich choisy—i.drach.
	semēce de citrōs } de chac.
	& d'ozeille. } dem.dr.
	bole d'Arm.prepa.dem.ōc.
	camphre naturel.—xij. gra.

Le tout puluerisé, comme il fault,
 sera incorporé ainsi que nous auons
 dict n'agüeres, & bien enueloppé en
 cuir, & gardé curieusement, pour
 en vser comme dessus. Si quelqu'un
 en veult prendre demye drachme en
 pouldre, sera assez: & pour les petits
 & douilletz, vn scrupule, aüecques

eau rose, ou d'ozeille,
 de pīpenelle, buglosse, en esté.
 d'endiue, de violettes.
 de melisse, soulsie, }
 chardon beneist, } en hyuer.
 ou bien vin blanc. }

*Confection en forme d'oppiate pour ledict
 effect, comme aussi pouldres, tablet-
 tes, & lozenges.*

Pre- { conserue de roses, } de
 nez { de buglosse, violettes, } cha.
 { nenuphar, & theria- } i. ñc.
 { que. }

escor-

CONTRE LA PESTE.

Pre- nez	}	escorce de citr.cōfiz,	} de ch.
		sucrerofat & violat,	
		diarhodon abbat.	
		racine d'Angelique,	} de ch.
		citouart, & dictāne.	
Pre- nez	}	semence de citrons	} de ch.
		ozeille, & soulsye.	
		cānel, & cloux-de ch. dem. sc.	
		bole d'Armenie prep.	
		fil s'ẽ trouue de bō. dem. on.	
		de safrā & cāph. - de ch. xv. g.	

Soit diligẽment puluerisé ce qu'il fault, & le tout mixtionné, receu & incorporé avecques syrop de citrõs, ou limons, ou violat en esté: ou bien de mente, absynthe, ou stechade en hyuer: & soit faicte cõposition en forme d'opiate, de laquelle on prendra tous les matins le gros d'vne noisette, simplement, ou en quelque vne des caues susdictes, & en fera veu

grand effect. Des mesmes drogues & pouldres susdictes (osté les cōserues) se pourront faire avecques eau rose & tragacant, tablettes ou petites lozanges couuertes d'or fucillé, pour mesme effect.

Eaue de senteurs singuliere contre tout air infect & pestilent.

Pre nez	{	de to' les santaux &	de cha. ij.
		bois d'aloe choisy,	drach.
		cānel. & cloux de gi. ch. dem. dr.	
		fleurs de rosmarin	de chac. i.
		& de lauande. —	scrup.
		racine d'angelique	de chac.
		fouchet, & flambe.	dra. & de.
		ambre gris, musch	de chac.
		& cāphre choisy,	dem. scrup.

Le tout soit puluerisé, & mis en vn sachet precipité en vne pinte de bōne eaue rose recente, accompagnée d'vne chopine de bon vin blanc, &

peu

CONTRE LA PESTE.

peu de vin aigre rosat, puis mis en vne phiole ou autre vase neuf, net, & bien estouppé, de peur d'estre esuëté & prendre l'air. Qui le voudra exposer au Soleil quelques iours, ne fera mal.

Il sera tressalubre & prouffitabile tous les matins & soirs, prēdre de la dictē caue au bout d'un mouchoir, & en lauer les arteres des bras, les temples, le col & gosier: & y trempant le bout du doigt en oindre le dedans du nez & oreilles, & si voulez la regiō du cuer & orifice de l'estomach, voire les parties viriles & genitales, qui ont ie ne sçay quoy de sympathie occulte avecq' tout le corps, & grande consideration en ceste maladie: ce qui est mal considéré auourd'huy. Ledit mouchoir ainsi trempé & abreué, vous seruira de pomme

de senteur tout le iour, si le portez.

Vous ne croiriez le grand effect de ceste caue, par le moyen de laquelle sans autre chose, plusieurs ont esté preseruez, & en ont voulu boire vn tantinet tous les matins avec caue de plantain, ou foulcye, ou ozeille, qui a faict miracle.

*Electuaire singulire de citron, experimenté par plusieurs, avecques
bonne issue.*

PREnez vne bonne pōme de citron entiere & recente, laquelle mettez tremper vne nuit en bone eaue rose, puis la cuisez à petit feu de charbō dedās vn pot neuf, avec sucre & peu de pouldre de cannelle pour les riches, ou avec bon miel pour les pauvres, en y adiouxant de ladicte eaue rose ou elle aura trempé: & la laissez cuire estant le pot bien couuert, iusques

ques à ce qu'elle soit comme pourrie & dissoulte, sans aucunement la permettre bruller par trop grand feu, ou faulte de son ius. Ce faict vous la retirerez du feu, laisserez refroidir en son mesme pot & saulsc, puis la garderez diligemment, & en prendrez tous les matins autant que comporte vne grosse auelaine, ou noisille: & si voulez, vous boirez par dessus vn bié peu de bon vin blanc, & aperceurez chose d'ôt vous me remercierez quelque iour, vous asseurant qu'en grandes & violentes pestes, ie n'ay gueres vsé d'autre remede preseruatif, n'aussi mes amys, dispersez en plusieurs lieux. Lediët electuaire a vertu cōtre tous venins, poisons & diuers accidētz, qui seroient longs à reciter, toutesfois bien cogneuz & expérimentez de ceux qui en retirēt le prou-

fit fort grand tous les iours, dont i'en suis fort ayse.

Voila ce que i'ay peu escrire & enseigner presentement touchant les secours preseruatifs de peste, tant exterieurs qu'interieurs : vous aduisant & assurant de rechef, qu'il en y a bien peu qui n'ayent esté experimenterz & approuuez. Qui en voudra d'auantage, se retire vers nostre liure Latin. Reste venir à la curation & aides, tant exterieures que interieures, de ceux qui seront surpris de fiebures, bosses, ou charbons pestilenticux.

LE SECOND LIVRE
des singuliers secours & aydes contre
la peste, proposez par M. Antoine
Mizauld Medecin à Paris.



PRES auoir monsté, par
la grace de Dieu, les ar-
mes defensives & reme-
des preseruatifs contre
nostre ennemy pestilét, lors qu'il fait
coursés & nous menace seulement,
mais ne touche encores, reste mainte-
nant enseigner comme il se fauldra
gouuerner & defendre s'il approche
de si pres qu'il nous surpréne & frap-
pe. Et pourautant que plusieurs timi-
des & mal assurez en ceste guerre
(comme en autres) bien souuent s'e-
stiment touchez & frappez, seulemēt
par opinion qu'ilz en ont, icy nous
dōnerōs les vraz signes de ceux qui

seront frappez de peste, puis les remedes.

*Signes & marques de ceux qui sont
frappez du dard de l'enne-
my pestilent.*

LE plus certain signe & le plus infallible est que communémēt sur le deuxiesme ou troisieme iour le corps est semé & presque par tout moucheté de taches & marques violettes, bleuës, perles, noiratres, plombées ou rougeastres, appellées du cõmũ & populaire, pourpre: iacoit qu'ẽ plusieurs elles ne se voiet qu'après la mort.

Aux autres se produisent incontinent & sans aucune cause manifeste, glandes ou enfleures qu'on nomme bosses: signamment autour du col, soubz les aixelles & aux aignes, comme aussi ailleurs, estants le plus souvent

uent accompagnez de charbon: qui est aussi vn vray signe & infallible, notoirement cogneu de tous.

Quant à la pulsatiō de l'artere brachiale, qu'on nomme le pouls, ell'est fort obscure & presque imperceptible: quelque fois fort frequēte & manifeste: autresfois pleine & vndoiante, puis du tout remise, avec sueur & debilitation, dōt s'en ensuit la mort.

L'vrine maintenant est fort blanche aux vns, noirastre à plusieurs: à autres trouble & fort grosse: à aucū rougeastre, avec hypostase ou boubier espois: mais tousiours puante & quelque fois contenant choses comme escailles, ou toilles d'araignées,

Les vns en rendent bien peu, avec escume par dessus: les autres beaucoup, & le plus souuēt trouble, comme celle de bestes cheualines.

Quelquefois ell'est fort claire, biẽ colorée & louable, comme de gens sains: qui est mauuais signe.

Le ventre d'aucuns se vuide excessiuelement, & en sont les excremẽts de diuerses couleurs: maintenant cendrée, tantost noirastre, quelque fois iaulne ou verde: mais tousiours avec intolerable puanteur.

Douleur de teste implacable, accompagnée d'ardeur & soif inextinguible avec resueries phrenetiques, & asperité de langue horriblement noire.

Grande difficulté de respirer, ensemble forte inquietude & agitation de corps dedans le liẽt, avec tout ennuy & impatience, grãs tressaillements & fremissemens entre cuir & chair.

Appetit languissant, & bien souuẽt du tout perdu: aux autres plus que naturel

turel & infatiable.

Pesanteur de corps non pareille, & desplaisir cōioinct avec chagrin, desespoir & volonté de mourir: comme aussi infiniz esguillonnemētz parmi le corps.

Lassitudes, foibleesses, defaillances de cuer, & lachetez coup sur coup, accompagnées de singlotz ou hocketz, baillemens & estendues de membres: qui est mauuais & dangereux signe.

Diuers & frequents vomissemens, ou au lieu d'iceux indicible & implacable appetit de tirer au cuer, avec froide sueur au visage, & affoiblissement de naturelle force: qui n'est bõ signe.

Plusieurs sont tousiours endormiz, les autres veillent incessammēt, avec douleur d'estomach & fiebure plus

moleste la nuit que le iour.

Tous les excrements qui procedent du corps sont puants à merucilles: comme la sueur, le crachat, l'urine, les selles, le vomissement, & l'alcine.

Les parties du corps exterieures sont à plusieurs froides, & les interieures outrageusement chaudes.

Aucuns crachent le sang, ou bien le rendent par le nez, ou par le fondement, ou par la verge: en si grand peril que bien souuēt la mort les attrappe l'endemain, ou sur le champ.

Grande palpitiō de cuer & difficulté de respirer moleste les autres: qui tournent par fois les yeulx en la teste, & changent de couleur fort estrange: qui n'est trop bon signe.

Le ventre est prodigieusement enflé à plusieurs, comme aussi les flans,

tout

rou ainſi que filz eſtoient hydro-
piques.

Les autres beguayent, avec aliena-
tion d'eſprit, & meurēt preſque tous
le troiſieſme, cinquieme, quatrieſ-
me ou ſeptieſme iour: ſelon la force
ou foibleſſe qui eſt en eulx.

*Signes de mort en ceulx qui ſont
frappez de peſte.*

IAçoit qu'au precedent diſcours
nous ayons marqué aucuns ſignes
de mort aux malades peſtiferez, nous
ne laifferons pourtant icy en produi-
re d'autres, afin que chacun en ſoit
mieux inſtruiēt & puiſſe donner or-
dre de bonne heure à ſes affaires, &
des ſiens auſſi: d'oc les ſignes de mort
à vn malade peſtiferē ſont commu-
nement telz.

Il tombe ſouuent eſſois en ſynco-
pe & pluſieurs grandes foibleſſes, &

defaillances de cueur: coup sur coup
 f'esuanouissant & perdant toute force,
 vigueur & cognoissance.

L'vrine est plombée, rougeatre,
 noire, trouble, pourrie & infecte. Sē-
 blablement les excrements du ven-
 tre comme gras ou de mēme cou-
 leur que ladicte vrine.

Le malade est par fois, surpris de
 sueur froide, tirant au cueur iusques
 au sang, avec vne grandissime puanteur
 des excrements & superfluitez
 vuidées.

Bien souuent ne se produisent au-
 cunes bosses ou charbons, le malade
 estant affligé d'une forte fiebre &
 debilitation incroyable.

Après auoir esté à la selle, auoir vo-
 my ou sué, il sent de grandz affoiblif-
 sementz & defaillances, avec refroi-
 dissement des extremittez du corps.

Se manifestantz quelques tumeurs, bosses ou charbons, ne se veulent rēdre, ou meurir par aucuns medecamentz, ains plustost se corrompent. Et si par quelques ferrementz en est faicte incision, il n'en sort qu'escumes ou caues ternies & comme noirastres, & bien souuent rien.

A plusieurs ne se produict aucune tumeur par dehors, estant neantmoins le malade intolerablement affligé dedans le corps, avec troublement & alienation de son esprit.

Les glandes, bosses, charbons ou pourpre apres leurs issues incontinent se retirent au dedens du corps, ou bien de molles deuiennēt dures.

Le nez, oreilles & ongles sont de couleur plōbée, & quelque fois grande quantité de vers sort avec les excrements.

L'inflammation, bosse ou charbon, se manifeste par dehors viz à viz du cœur, ou sur l'estomach, ou gosier, & le malade tombe par fois en sueur froide, qui est signe trefeuident de mort.

Il vomist coup sur coup les medecines, viandes & remedes qu'on luy donne, & en ensuit grande foiblesse, debilitation & decadence d'espritz: signe tresmauvais.

Tant plus de susdictz signes se produiront, plus tost s'en iront les pauvres malades. Mais si vn ou deux seulement se proposent, le patient estât ieune & de bon courage, avec l'aide de Dieu, le secours des doctes Medecins, & la diligēce des gardes, il pourra guarir & reprendre santé.

Des fiebres pestilentiellles, & de leur curation.

ICy ie laisseray la diffinition, diuision, & toute autre description des fiebres pestilētielles, pour enauoir suffisammēt escript en nostre opus-
 cule Latin. Parquoy i'entreray de droiēt fil en leurs aydes & remedes: lequelz ie poursuiuray en deux mots, delaisant la reste aux medecins des malades, afin de faire approches au principal. Incontinent donc que quelques vns se sentiront assaillis de fiebre pestilentielle (par les signes n'agueres donnez) il leur conuiendra tout soudain, silz estoiet constipez, prendre vn clystere, ou bien vn bon suppositoire, & apres l'auoir rendu, vser de quelque chose cordiale, soit potage, iuleb, ou oppiate: puis deux ou trois heures apres, proceder à la seignée, ainsi que nous mōstrerōs. Et ne fault oublier que lediēt clystere

doibt estre doux & bening. Quant aux purgations, veu que le mal consiste plus en qualité venimeuse, que quantité de matiere, ie seray d'aduis avec Corneille Celse d'y proceder sagement & mediocrement. Ou il aduiendroit que le patiēt n'auroit que faire de clystere, seignée ou médicament (qui est fort rare) il sera fort bõ que à l'instant de sa maladie, il prene quelque potion antidotale, & breuage de contrepoison: tel que pourra estre le nostre suiuant; si voulez, duquel plusieurs se sont fort bien trouuez. La composition est telle.

Pre- nez	{	de bonne cannelle, -dem. òc.	} de cha. i. drach.
		de theriaque bõ & viel. -i. dr.	
		de bõ bole d'Arm.	
		diēt boliarmeni,	
		diarhodõ abbatis.	
		rhabarbe biē choisi, dem. dr.	

tro-

CONTRE LA PESTE.

Pre-
nez } trochisq de spode
des trois fantaux, } de cha.
de camphre recēt, } i. scrup.
& de terre séecllee.

de sucre rosat & } de chac.
de buglosse, } i. once.
de safran orient—dem. scrup.

estant diligemmēt puluerisé ce qu'il
fault, le tout sera dissoult & receu en
bonnes eäues.

de chardō benist, }
d'ozeille, soulcie, } de chac.
scabieuse, buglos. } dem. onc.
roses & plantain.

puis coulé & passé par la chauffe
d'hypocras, & faicte potion antido-
tale: de laquelle prédra tous les iours
le patient pestiferé, vne, ou deux, ou
trois onces, au matin & sur la mi-
nuict, lors que son estomach sera vui-
de: & ne fauldra de deux ou trois heu-
res apres boire ne menger. C'est cho-

se fort singuliere & approuuée.

Pour les pauvres & mediocres sera assez prédre le gros d'une petite noifille de bon theriaque dissolt en demy voirre de deux ou trois des eaues precedentes. Ou biẽ vser de quelque antidote de ceux que nous auõs proposez au premier liure, entre les remedes preseruatifs!

Si quelqu'un se faschoit de breuuages, pourra vser de ceste cõposition.

Pre ncz	cõserue de roses	} de chac.ii.
	& de buglosse.	
	trochif. de cãphre	} de chac.i.
	santaux & spode.	
	bole d'Arm. prep.	} i.drach. d'b
	escorces confites	
	de citrõs & limõs	} dem. onc.
	bon theriaque	
	syrop de limons	ij. onces.
	de safran nouueau	vi. grains,
		soit

soit le tout incorporé comme il fault, & reduict en electuaire ou forme d'oppiate: de laquelle le malade prédra tous les matins deux ou trois heures deuant menger, vne drachme ou deux simplement, ou avec vin blanc en yuer: & en esté avec caue d'ozeille, ou autre cy deuant exprimée. S'il peult fuer abondamment, se pourra asseurer de guarison, avec l'ayde de Dieu, faisant le debuoir au reste.

Du menger & boire des malades pestiferez.

QVant au menger, fault qu'ilz vissent de potages & viâdes qui les refraichissent & deseichent, ne soient corruptibles tant interieurement qu'exterieurement: faciles à digerer & distribuer. Qui serõent en tout & par tout accõpaignées de ius d'ozeille, citrons, limons, orenges, ou ver

ius de grain . Et si le malade ne vou-
loit menger, le faudroit contreindre
& solliciter, luy presentant peu &
souuēt : afin qu'il restaure ses espritz,
& repare ses forces affoiblies, par re-
staurentz, gelées, expreinctes ou con-
sommez s'il est riche : ou il y aura
toufiours quelque peu de ius ou ver-
ius susdictz. Vous aduisant qu'on ne
void gueres malade pestiferé bien
mengeant qui meure, s'il n'y a offen-
se d'ailleurs. Touchant le boire, fault
qu'il se abstienne de vin, aumoins les
premiers iours, s'il n'auoit grandes
foibleesses & defaillances avec petite
fiebure: car lors on luy pourroit fai-
re succer quelque roustie, ou pain
trempé en vin. Il vsera doncques de
syrops & ius de citrons, limōs, oren-
ges, roses, violettes & semblables, a-
uec eaue d'orge, d'ozeille, ou ptisane.

Et

Et ne fault omettre qu'on doibt par diuerſes fois & ſouuent, ſoit iour ou nuit, bruſler en la chambre du mala de bois odorantz, faire parfuns, & luy appliquer epithemes refrigeratifz & roboratifs ſur la region du cueur & foye, ainſi que nous les auons deſcriptz au liure precedent.

Du dormir & repoſ de ceulx qui ſont peſtez: comme auſſi des vieillés.

IE ne puis icy conſentir à ceulx qui trop rigoureuſement commandēt qu'on garde d'aucunement dormir les pauures affligez de peſte: meſme- ment les deux premiers iours, enioi- gnant qu'ilz ſe pourmeinent, trottēt & touſiours allent ou ilz pourront. Et à ceulx qui n'aurent la force ou commodité de ce faire, qu'on les con- traigne de veiller, par

grandes clameurs,

fons de tabourins,
de trompettes,
de clochettes,
de chaulderons

ou autre violent bruit

par lequel, bon gré mal gré & en despit d'eulx, ilz seront contrainctz veiller, & signamment quād le charbon apparoiſt. Helas, ſi telle choſe eſt fort moleſte & inſupportable à ceulx qui ſont biē ſains, combien, ie vous prie, le doit elle eſtre à malades: voire de telle maladie qu'elle cauſe toute reſolutiō d'eſpritz, deſaillāce de cœur, & aneantiſſement de force & courage. Nous permettrons donc aux pauvres malades vn biē peu dormir, ou plus toſt ſommeiller: comme vne petite heure ou deux le iour, & autant la nuit: plus ou moins, ſelon l'eage, force & vigueur du malade, & violence

lence ou douceur de la maladie: prenant toutesfois tousiours garde qu'il ne dorme trop profondement iusques à rōfler, car il est fort perilleux, comme nous deduisons ailleurs. A quoy pourra estre soigneux celuy ou celle qui fera compaignie au malade, luy touchant souuent les piedz, mains & nez, lesquels s'ilz trouuent froidz, le fault diligemment & fort rigoureusement esueiller, ne pardonnant en ce à son pere, car c'est presage ou plus tost signe euident de foiblesse, defaillance & mort prochaine, s'il n'est excité & secouru par choses cordiales, & autres cy deuant escrites. Mais si par fortune il aduenoit, comme souuent il faict, que le patient ne dormist iour ne nuict, il conuiendra luy faire attirer par le nez suc de laitues, & pour pied: & luy appliquer

les fueilles vn peu broyées sur les sutures anterieures de la teste tondue, y adioustant huile de nenuphar, & souuent les renouvelant. Ou bien oindre le frôt, temples & narines de l'onguēt nommé populeon, dissout en huile de pautot, y adioustant bien peu de safran : ou broyer avec son orge mundé, semence de pautot.

Voila ce que presentemēt ie veulx proposer pour l'aide & soulagemēt des fiebres pestilentiellles, renuoyāt ceulx qui en desireront plus ample discours à nostre opusculle Latin. Je prendray donc le chemin pour venir aux aides & remedes des compaignons ordinaires desdictes fiebres, qui sont bosses, pourpre & charbons appelez anthrax d'aucuns qui veulent conuertir le Grec en vulgaire François.

CONTRE LA PESTE.

*Des tumeurs pestilentiels, qu'on
appelle bosses.*

NOus auons dict, ou paraduenu
re oublie à dire, q̃ toute fiebre
pestilentielle est communement &
le plus souuent accompagnée de
bosse, pourpre, ou charbon : autre-
ment elle est mortelle, ou fort dange-
reuse : pour les causes alleguées par
nous ailleurs. Et ne fault omettre,
que les susdictz bosse, charbons &
pourpre n'occupēt tousiours les par-
ties exterieures, ains aussi les inte-
rieures, & par fois vnes & autres, par
communication de l'humeur pesti-
lent & venimeux.

Si interieuremēt le cœur en est fai-
si sans aucune apparoiſſance exterieu-
re, la vie est deplorée, & s'en ensuit
mort subite, apres infinies defaillan-
ces & foibleſſes.

Si la cavit  du poulm , ou les m branes du thorax, ou le diaphragme en sont occupez, le pauvre patient apres grandz perilz de suffocation, en deux iours s'en va ad patres, comme on dict:ou bien il est en grandissime danger.

Si le cerueau en est interieurement assailly, & ne s'en peult descharger, suruient phrenesie, puis la mort.

Si le foye en est surpris, inflammation la siege, accompag e de mort le plus souuent.

Et tout ainsi que nous disons fieures pestilentiellles n'estre gueres sans vrayes bosses & charbons exterieurs ou interieurs, aussi fault il dire & croire que lesdictes bosses & charbons pestil tielz ne sont gueres sans fiebures:& signamment ceulx qui se produisent aux glandes & em ctoires

CONTRE LA PESTE.

res ou descharges & escouloires du
cœur, soubz les aixelles,
du cerueau, au col,
du foye, aux aignes.

S'il s'en voit, ou apparroist ailleurs,
comme bien il faiët

aux bras, espauls,
doz, ventre, reins,
fesses, cuisses, iambes,
pieds ou autres lieux,

peuuent quelque fois estre sans fieb-
ure, ou biē petite & legere : mesmes à
gens temperez & sobres, qui ont le
corps peu immunde, & les facultez
d'iceluy fortes & robustes.

Quoy que soit, toutes bosses & char-
bons qui se produisent apres la fieb-
ure sont estimez plus dangereux &
mauuais, que ceux qui la precedent.
Les raisons se trouuerōt en nostre li-
ure Latin. Cela declairé & premis, ie

viens aux aydes & remedes des tumeurs pestilentiellez, qu'on nomme bosses, plus congneues d'un chacun, voire du populaire, qu'il ne voudroit. Qui sera cause que ie ne m'amuseray icy à autremēt les diffinir, descripre & esplucher, comme i'ay faict en nostre methode Latine.

Curation methodique des tumeurs pestilentiellez, qu'on nomme bosses.

DEuant qu'entrer bien auant en matiere, nous faisons quelque petit discours sur les eages. Et enseignerons premierement la façon de procéder à la curation de ceulx qui ne sont capables de forts medicamēts & remedes, cōme aussi de la seignée.

Remedes pour les petits enfans qui tettent.

S'il

S'il aduient (comme souuēt il fait) que pauures petits enfans qui encores pendent à la mammelle de leur mere, ou nourrice, soient atteints & frappez de peste, se produisant quelque bossellette ou petit charbon en leur douillet corps, faudra que la nourrice (soit mere ou autre) porte & prenne les medicamēs & remedes interieurs pour son petit nourriçon si elle l'aime, comme certes elle doibt faire, ou bien elle est plus que Louue & matine. Donc il sera expedient qu'elle vse pour le regard de la fiebure, des remedes cy deuant escripts, mais non tāt estroictement: & que sur tout elle se nourrisse de potages & viandes qui ayent faculté d'alterer l'effrenée fureur & chaleur du venin & humeur pestilentiel de l'enfant, par le moyē de son laiēt,

qui sera ainsi rendu medicamēteux, & servira d'antidotes pour ledict enfant. Mais sur tout fauldra qu'elle se garde deux ou trois iours pour le moins de boire vin (qui est chose mal plaisante & difficile à nourrices) sinon qu'il fust tresbien trempé & baptisé.

A ceulx qui seront vn peu grandelets, comme d'vn an ou enuiron, s'ilz n'ont le vêtre lasche, sera bon le prouoquer & irriter par vne bien deliée racine de persil, ou de porée, oincte de peu de beurre fraiz: ou bien leur inserer doulcettement dedans leur petit fondemēt, vn morcelet de penicles, gros comme le tueur d'vne plume d'oye, & long cōme vne grande espingle: ou bien prendre les remedes cōmuns aux nourrices. Apres auoir rendu leurs petits excrements,

si au-

CONTRE LA PESTE.

si aucune tumeur ou bosse apparoiſt
fauldra auoir des eſtoupes de chan
ure bien pignées & nettoiyées (afin
que les eſguillōs ne blessent l'enfant)
& les disposer en forme d'vn petit
carreau : puis les tremper en la de
coction

de melilot,

chamemile,

mauluc,

aneth,

& fueilles de liz.

& les fort espreindre ou pressurer
entre deux tranchoirs ou asiettes,
apres les appliquer chauldes (mais
nō par trop) sur la tumeur & bosse,
les chāgeant & renouellant de trois
en trois heures pour le moins, tant le
iour que la nuit : iusques à ce que la
tumeur & bosse par insensible trans
piration & dissipation d'humeur soit

euauouye, ou bien conuertie en maturation & boue. Laquelle il cōuendra euacuer bien doulcement, & peu à peu. Mais ne fauldra oublier de donner vne garde & ayde à l'enfant, pour soulager sa mere nourrice lors luy seruant de Medecin & medecine. Si audiect temps se produisoit quelque charbon, le fauldra traicter par remede les plus doulx que faire le pourra: ainsi que nous dirons cy apres.

*Pour ceulx qui passent quatre ans
iusques à neuf.*

FAult tousiours proceder en premier lieu par la curatiõ de la fiebre, si elle est violente, & faire que le ventre soit lasche, autrement le faudroit ouurir par quelque suppositoire, ou petit clystere doulx & bening. Puis refrigerer, ainsi qu'il a esté dict, exterieurement & interieurement le
cœur

cueur & foye, qui pour lors sont fort
 eschauffez & comme boullonnantz.
 Cela faiët, aucuns anciens Medecins
 sont d'aduis d'esuenter & ouurir vn
 bien peu la veine, ainsi que nous de-
 duirons cy apres: Et se fondent sur le
 faiët d'Abinzoar Medecin Arabe,
 qui feit seigner vn sien enfant, eagé
 (s'il me semble) de trois à quatre ans.
 Les autres expressement defendent de
 n'attenter n'entreprendre aucunement
 ladiëte seignée en tel eage, & suis de
 leur aduiz, s'il n'y auoit quelque vr-
 gente necessité. Parquoy la seignée
 omise, fauldra incontinent prendre
 chemin vers les aydes pour la bösse,
 si aucune apparoißt: qui ne seront au-
 tres que pour le precedët: ou bië des
 plus doulces, & benignes que nous
 escriprons cy apres.

*Pour ceux qui passent dix ans iusques à
vingt. Et de l'vsage & application
des ventouses.*

ENcores en tel cage plusieurs me-
decins font doubte de la seignéé,
ce que ie n'ay iamais faiët, & ne feray
mesmement en ceste maladie & au-
tres de violéce, & cōsequence: ioinët
qu'en ce pays Septentrional la nour-
riture est grande, & le sang en abon-
dance. Qui n'en voudra vsfer, sera
tresbon qu'on applique ventouses
propres, quatre ou cinq doigts au des-
soubz, ou costé de la bosse. Ou bien,
si quelques vns craignoiët le feu des-
dictes ventouses, prendre des potz
neufz de terre, ou bois ou voirre: les-
quelz bien eschauffez dedans caue
boullant (estant le lieu sur lequel on
les veult appliquer defendu par quel-
que chappellet de linge, à fin que le
bord

CONTRE LA PESTE.

bord des vaisseaux touchant la chair ne l'offense) seront tant de fois appliquez l'un apres l'autre, audit lieu que dessus, qu'il y aye tumeur & rougeur suffisante: laquelle conuiendra subtilement & legierement inciser comme de coustume: & de rechef appliquer sur les incisions lesdictz vases iusques à ce qu'õ aye extraict tant de sang, qu'il appartiendra & cõuiendra à l'eage & force du malade. Croiez que telle façon tire merueilleusement & profondement. Icy trouueront grandissime prouffit noz Bourbonnois & autres, en leurs baings naturelz d'eauues chauldes: car au lieu de ventouser, ilz se pourrõt faire corner, comme dict est.

Il y en a qui appliquēt aux susditz lieux, ou plus pres, quelque fois sur la mesme bosse, quatre ou cinq sang-

fues : & quand elles sont remplies & cheutes, ilz mettent tout foubdain sur le lieu vne ventouse. Ce que ie ne puis louer en ieunes adolescentz, & pourroit estre plus tolerable a gens robustes & forts.

*Aduertissement digne de noter pour les
ventouses & incisions.*

IEn'ay iamaistrouué bon qu'on ventouse ou incise profondement, cōme aucuns conseillent, les glandes ou emissioires des parties nobles du corps, pour la communication, alliance, & vicinité qu'elles ont nō seulement avec lesdictes parties, ains aussi avecques tout le corps par sympathie. Parquoy fault tousiours regarder à faire incision & attraction d'humour pestilent ou venimeux le plus loing que faire se pourra des susdictes parties nobles, & leurs emissioires.

res. Les causes se trouueront en nostre liure Latin.

Donques si quelque tumeur ou bosse pestilente apparoist derriere les oreilles, au gosier, ou au col, pour la vicinité & alliance du cerueau partie noble, l'application des vêtouses & incision se pourra faire commodement sur le chignon du col, & comencent du doz sur les espaulles, & environ les premieres vertebres dudit col, ne touchant iamais sur la partie de deuant.

Si elle se monstre soubz les aixelles, la partie charnue vers le doz à costé, ou les muscles du doz pourrôt estre commodement ventousez & incisez.

Si elle se produict aux aignes, la cuisse du mesme costé, ou la fesse pourront facilement recepuoir lesdictes ventouses & scarifications;

comme parlent les barbiers.

Aux autres lieux du corps, on pourra proceder cōme nous auōs escript cy deuant.

*Pour ceulx qui passent vingt ans, &
tous autres.*

EN tous ceulx icy, le cas aduenant la seignée n'est aucunemēt defendue, toutes circonstances obseruées. Parquoy tout incontinent qu'aucune tumeur pestilentielle se produira (si autre chose n'empesche) pendant q̄ l'humeur n'est encores beaucoup enuenimé, ne fault aucunement differer ouurir telle veine que cy apres nous escriprons. Et si besoing estoit, partir la seignée : c'est adire par deux fois tirer le sang, afin de soulager le pauvre malade & le refaire entre deux saignées, tirāt tant de sang qu'il appar tiēdra & pourra porter ledit malade.

De

CONTRE LA PESTE.

*De la seignée, & en quelles parties
elle se doit faire.*

SI la bosse ou charbon se produict
pres des oreilles, ou parmi le col,
ou aux parties qui sont soubz iceluy
tirant vers les mains, fauldra faire la
seignée du bras qui respond au costé
ou est la tumeur: & prendre la veine
appellée communement.
cephalique, espauliere
& exterieure.
ou bien la moyenne
dictée mediane.
ou celle qui est entre le poulce
& le doigt qui l'ensuyt.

Si ladicte tumeur apparoint soubz
les aixelles ou ez enuirs, comme à
la poictrine ou doz, la phlebotomie
se fera du bras respondant à ladicte
tumeur: & y sera piquée la veine ap-
pellée communément

basilique, axillaire &
hepatique.

ou en son lieu la mediane.

ou bien celle qui est entre

le petit doigt & son voi-

sin, nommée saluatelle.

Mais si toutes les deux aixelles es-
toyēt occupées de tumeur pestilent,
les susdictes veines seroient ouuertes
aux deux bras : tirant toutesfois plus
de sang du costé ou seroit la plus for-
te tumeur & douleur.

Si ladicte tumeur apparôist soubz
le nombril, aux reins, ventre, fesses ai-
gnes ou cûisses, fauldra ouürir la vei-
ne du mesme costé.

qui est au iarret, viz à viz

du genoil par derriere.

ou celle qui mieux appa-

roistra au bout du pied.

ou bien celle qui est pres

de la cheuille, nommée
saphene,

dedans le pied ou dehors, selon que
le bubō ou bosse se produira en l'aig-
ne, ou cuisse plus dedans, ou plus de-
hors. Et faut noter que la seignée des
veines tant aux mains qu'aux piedz
communemēt se faiēt en eae chau-
de, qui est assez cogneu aux barbiers
& chirurgiens.

Mais voirement, s'aucune tumeur
n'apparoist, que fauldra il faire? sei-
gner du costé ou le patient sentira
plus de mal, plus d'eslancementz &
douleurs. Et ne fault oublier que le
present discours de seignée, se peult
aussi accommoder au charbon pesti-
lent, qui peult prendre place en tous
lieux du corps. Ce que vous retiēdrez
bien, car cy apres ie n'en feray aucu-
ne repetition.

Aduertissement digne de noter.

Pendant que la veine sera ouuerte, il est tresbon d'appliquer sur la bosse & charbon, ou plus tost aupres d'iceux, vne ventouse assez ample: à fin que l'humeur pestilent estant agité ne regorge & se retire vers les parties nobles: qui causeroit la mort au patient. Lequel doibt aussi pendant ledict temps, & celuy auquel il prendra medecine, defendre, soulager & fortifier le cueur par dehors d'epithemes & applications propres (si ladicte bosse ou charbon n'auoyent ia occupé le lieu, qui est cas mortel) & par dedás de choses cordiales & antidotes exquis: desquelz nous auons parlé au premier liure.

Il sera fort bon à ceulx qui ont le corps douillet & debile, au lieu des susdictes ventouses appliquer vne
 esponge

CONTRE LA PESTE.

esponge trépée en la decoction laquelle nous auons descripte n'agueres: sçauoir est

de chamemile,
melilot,
maulucs,
aneth,
capilli Veneris,
& fueilles ou fleurs
de liz,

laquelle esponge estant fort pressurée, sera mise chaulde sur la tumeur ou peste, quelque part qu'elle soit. Et quand on l'ostera, il y faudra appliquer estoupes de chanvre fort chaudes, afin de reuoquer l'humeur pestilent & venimeux des parties nobles & interieures, audict lieu exterieur.

La section de veine expediée ne fault oublier de faire prendre au patient vne ou deux onces de quelque

syrop ayant faculté d'esteindre ou adoucir la ferueur & ebullition du sang, avec caues propres, & si voulez telles que nous auons monstré. Semblablement de faire feu de bois odorant, exciter parfuns nō trop chauldz si c'est en esté, & respendre herbes & rameaux parmy la chambre, avec caue rose & bon vinaigre.

Fauldra aussi donner peu & souuent des choses suiuanes aux malades qui seront riches: sçauoir est
 de iulebz refraichissantz,
 de confitures cordiales,
 de restaurantz, ou gelées,
 de consummez, expreinctes,
 & choses semblables, qui les puissent fortifier, comme aussi recréer leurs espritz, & conforter le cueur.

Voila vn moyen de seurement curer toutes bosses & tumeurs pestilentic:
tics:

CONTRE LA PESTE.

tieles : mais il ne fault omettre que ou lon voirroit croistre à l'œil la bosse ou tumeur, il fault estre diligēt aider à nature, laquelle s'efforce ieter dehors l'humeur pestilēt. A quoy seruirōt beaucoup ammoniac & galban dissoulz en bō vinaigre, & incorporez avec terebenthine . Ou bien l'emplastre de melilot, ou de graines de laurier . Et autres remedes attractifz & reuocatifz, lesquelz cy apres nous presenterons.

*Autre maniere de reuoquer & attirer
dehors tout humeur pestilent.*

PLusieurs excellēts Medecins mes amis, qui ont voyagé en diuerfes nations, m'ont dict & asseuré qu'ilz ont guarý plusieurs notables Seigneurs frappez de peste, en la maniere que ie vous escriray.

Apres auoir ordonné vn clystere,

ou purgation benigne (si le temps le permettoit) ilz faisoient appliquer trois ventouses, en telle sorte que la premiere estoit au dessouz de la bosse ou tumeur: & la secõde apres elle, la tierce suyuant les deux: tousiours contre bas en droicte ligne soubz le lieu ou le malade disoit sentir cõme vne chorde tendue, ou vn nerf fort dur. Et faisoýẽt lesdictes applicatiõs au matĩ, midy soir & sur la minuiẽt, ou si voulez de six en six heures: principalement si le malade pestiferé auoit plusieurs defaillances, tant iour que nuiẽt: afin de retirer du cuer & parties nobles l'humeur pestilent & venimeux, qui cause telles foibleesses & defaillances. Et aussi pour aider à la maturation & suppuration de la bosse & tumeur pestilẽte: ainsi que vous oyrez cy apres. On leuoit lesdictes ventouses apres y auoir esté enuiron

demie heure ou moins, selon la vertu du malade: puis en leur lieu soudainement & incontinent estoient appliquées estoupes chauldes, ou bié laine tondue du col d'une brebis, laquelle on trempoit en la decoction susdicté, & estât fort pressurée, on l'appliquoit le plus chauldemēt que faire se pouuoit sur la bosse, avec reiteration & renouvellement: dont s'en ensuiuoit allegeance tresgrande accompagnée de parfaicte guarison. Ce que i'ay bien voulu icy communiquer & escrire au proufit, vtilité & soulagement des pauures malades.

I'ay cogneu aucuns qui pour ce mesme faict ont prins vne grenoille viue ou deux, & leur ayant seulement escorché le ventre, les ont appliquées sur la bosse, ou au dessoubz. Ce que ie n'ay trouué fort bon, pour les cau-

ses alleguées ailleurs:iaçoit qu'ilz s'en fussent bien trouuez.

Remedes attractifs & euocatifs, faisants ampoules & vlceres, & pourront seruir de cauterres potentielz.

PLusieurs pour la mesme euocatiō & attraction d'humeur pestilent, voire pour faire vlceres & ampoules par lesquelles se puissent les parties nobles descharger & vuider, ont appliqué emplastre de galban, ayant au milieu pouldre de cantharides, & l'ont laissé sur le lieu cinq ou six heures. Les autres se sont aydez.

de fiente de pigeons avec
huile de coste.

de limaçons pilez avec leur
coquille.

de cātharides en pouldre
avec leuain.

'dufor-

CONTRE LA PESTE.

d'euforbe avec terebin-
thine & peu de pyretre.
de souffre & sel gemmé, a-
vec huile d'euforbe.

de fiente de moineaux ou
oyes, avec sein fallé de
pourceaux.

de l'herbe dicté bassinetz
pilée & seule appliquée.

de l'escorce de la plante
appelée flambe, ou feu.

de chaux viue avec poix
& poiure,

De gouttes d'huile ou chan-
delle ardente.

Lesdictes choses s'appliquent sur
les muscles des bras, espauls, cuisses
ou iambes de la partie en laquelle se
manifestera la bosse ou charbõ. Afin
qu'il se face ampouille ou vlcere, par
lequel puisse deriuer l'humeur pesti-
lent

lent & estre retiré des parties nobles. Et fault laisser ledict vlcere ou ampoulle long temps ouuerts : mettant seulement par dessus du beurre fraiz, avec vne fucille de choux . Ce n'est certes chose à vituperer, si gnammēt à gens forts & robustes, lesquelz i'ay veu s'en bien trouuer, & conseillé d'ē vsfer : mais avec discretion , de peur qu'on n'offense quelque tendon, ligament, veine, artere ou nērf. Aucuns ont faict lesdictes ampoules & vlceres avec gouttes d'huile, ou de chandelle ardante, qui est fort dangereux.

I'en ay cogneu d'autres qui du premier ou second iour, avec chaudes tenailles, ou ferrements, ont pincé, braisillé, cerné, & decouppé leur bosse ou charbon, les laissant ainsi escouler, Les autres l'ōt dechiquetée avec rasoirs, & en ont esté guaris. La fluxiō
de sang

de sang qui y pourroit suruenir fectanche auecq' estouppes abbreuées d'huile rosat, & moyeufz d'œufz. Ainsi que i'estoye sur le present discours, le communiquât, comme i'ay de coustume, à quelque mien amy bien versé à la medecine, i'ay esté par luy aduerty que souuentefois il a faict deriuier pestes & bosses au lieu ou il a voulu: faisant petite ouuerture en iceluy, & y mettant peu d'ellébore concassé. Ou bien appliquant soubz la plante du pied de l'esclaire broyée & chauffée: ou l'herbe des prez nommée bassinets*. Ce que i'ay bien voulu icy cōmuniquer au profit de tous: Mais ne fault entreprendre telles choses sur la region du cuer, estomach, poitrine ou gosier: ne sous les aixelles, ne aux aignes.

*Remedes quand la bosse & peste se
retire dedans le corps.*

SI par fortune on apperceuoit la bosse ou charbon se retirer dedans le corps, ne fault faillir incontinent la reuoquer, ainsi que nous auõs dict. Et si l'un ou l'autre changent de couleur tendant à mortification, comme bleue, perse, ou noire, fault estre diligent d'y faire incisions & les deschi- queter, autrement en ensuiura mort. Puis faudra lauer les decoupeurs d'eau salée avec huile rosat: afin que le sang qui en sortira ne se fige, caille, ou desseiche.

Aucuns pour ce mesme faict ont appliqué sur la bosse & charbon ainsi incisez, ou non incisez, le cul plumé d'un ieune coq qui n'auoit monté sur poules, luy frottants ledit cul de sel broyé & entrefermantz le bec
afin

afin qu'il fust contrainct attirer l'humour & vapeur pestilent par le cul avec l'air. S'il mouroit ilz en auoient d'autres tous prestz. Qui n'est chose vituperable, car i'en ay veu de grãdz proufitez aduenir.

Les autres prennent des pigeõs ou coulombs lesquels ilz fendent par la moitié tous vifz, & soudainement les appliquent sur la bosse ou charbon, & laissent iusques ilz deuiennēt noirs & puans, les changeans, comme dict est. Qui est aussi chose tresbonne & bien experimētée. Mais ne fault oublier d'enterrer lesdictes volailles bien loing du logis & profondemēt, de peur d'en auoir l'infectiõ: ou que les chiens & chatz ne les mangent & r'aportēt aux domestiques la contagion.

*Des remedes maturatifz & sup-
puratifz.*

LEs choses precedentes ayant esté cōtinuées iusques au quatriefme ou cinquiefme iour, plus ou moins, selon la bōté ou malice de la tumeur pestilente ou charbon, fauldra en apres venir aux aides & medicamens qui fairont meurir & apostumer la peste, ainsi qu'on parle cōmunemēt. Et pourautant que lesdictz medicamens sont presque tous visqueux, gras, pasteux, gluāts ou oleagineux, (qui est cause qu'ilz peuuent empescher la transpiration & euaporation de l'humeur pestilent, le faisant regorger & reprendre chemin vers les parties nobles, dont il estoit repoulsé & deiecté) pource est-il que les sages Medecins n'ordonnent gueres medicaments maturatifs & supputatifs de-
uant

uant lesdictz iours (mais bien quelques fomētatiōs) si nature ne s'estoit mise en grandissime debuoir des le commencement de la maladie. Autrement sont ensuiuiz mille hestiomenes, gangrenes, mortifications & autres incōueniens non moins dangereux qu'incurables, pour la precipitation desdictz medicamens qui souuēt bruslent, endurecissent, pourrissent & corrompent la matiere deuant le temps . Pour obuier à telz accidentz fauldra vser au commencement de doulx & benigns remedes maturatifz. ^Δ

*Cataplasme & liniment maturatif,
fort doulx.*

QVand donques on aperceura la tumeur ou bosse croistre, lors il fauldra commencer à solliciter sa maturation par doulx remedes, comme

pourra estre cestuy cy.

Pre- nez.	{	racines de mauues	{	de cha.	
		& oignons de liz		dem.li.	
		figues grasses	—	xx.	
		femence de lin	{	de cha.	
		& fene grec		j. once.	
		fucilles de mauues	{	de cha.	
violettes, paritoire	j. poi-				
ozeille & foulcie	gnée.				

Le tout soit cuiet en vn pot neuf avec bonne eaue, puis tiré, esgouté & pilé, y adioustant

sein de pourceau, fraiz,

fondue & coulée — vj. onc.

huile de lin & { de chac.

de camemile { ij. onc.

en soit fait cataplasme, pour estre appliqué chaud avec estoupes ou laine à tout son suin, sur la bosse & changé soir & matin. Mais ne fault qu'il presse fort le bout ou nombril

de

CONTRE LA PESTE.

de ladicte bosse. Si vous voulez passer par l'estamine les susdictes matieres fort cuietes, en faires avec huile rofat bon liniment.

Qui voudra vn autre cataplasme tresdoux pour les gēs douilletz, vse de cestuy cy.

Pre- nez	{	de bonne eaue,—dem.lib.
		farine de froment,—iiij. onc.
		figues grasses,—xv.
		mie de pain de son—iiiiij. onc.
		huylle de liz & } de cha. ij.
		de chamemille. } onces.
	{	gresse de geline,—vne once.

Le tout bien cuiet, soit incorporé & redigé en cataplasme applicable comme deuant.

*Diuers maturatifz tresfaciles &
bien experimentez.*

PLusieurs pour le mesme faict prennent vn gros oignon, lequel ilz

cauent & y adioustent peu de theriaque, & beurre fraiz, avecques dix ou douze fueilles de rue: puis le couvrēt & enucloppent en estoupes ou papier, le faisant fort cuire soubz les cédres chaudes, Ce faict ilz le broyēt & avecques laine à tout son suin, le plus chauld que faire se peult, l'appliquent sur la bosse ou charbon, le renouvelant souuent. C'est chose par moy & plusieurs autres bien experimentée.

I'ay coustume de faire cuire en la mesme sorte de la petite ozeille ou grāde: laquelle sortāt du feu, ie precipite en huille de liz, ou chamemile, & l'impose biē chaude sur la tumeur pestilēte, à la forme que dessus. C'est aussi chose fort singuliere.

Aucuns font ainsi cuire racines de liz, puis les pilēt avecques du leuain
& vicil

& vicil sein de pourceau, puis auec vn linge, ou estoupes, les appliquēt le plus chauldement qu'ilz peuuēt, & remuent deux fois le iour, pour le moins.

Les autres ont mis en vn drapelet bien rare, ou parmy estoupes, de la cendre de sermēt de vigne fort chauld avec peu d'huylle de noix, & l'ōt ainsi appliquée & souuent changée.

Les autres font cuire vn gros oignon tout seul, en la façon que dessus, puis le diuisent en quatre parties & le mettent plus chauldement qu'ilz peuuent sur la bosse, le renouvelant tant de fois que l'apostume pestilēte soit percée & entamée.

Quelques vns font cuire en vn pot neuf fucilles de mauues & rue avec vn oignon de liz & huille rofat, puis pilēt le tout ensemble, & l'appliquēt,

comme dessus est dict.

Plusieurs par mō conseil ont prins fueilles de fuscau, hiebles & ozeille: lesquelles ilz ont fait cuire soubz cēdres chauldes, & pilé avec sein doulx & peu de leuain, puis sur estouppes chauldemēt appliqué au lieu de la peste ou bosse: dequoy ilz se sont merueilleusement bien trouuez. Autres experiences pour ce mesme faict seront produictes à la fin du present liure.

Aduertissement.

FAuldra appliquer à gents douilletz qui ont le cuir fort rare, les plus doulx remedes que faire se pourra: Et à ceulx qui seront robustes & auront le cuir dense & espois, plus fortz: ne craignant aucunement la douleur qui en pourra suruenir, car elle attire l'humeur venimeux, & ma-

tiere pestilente vers la bosse & apostume. Toutefois si ladicte douleur estoit trop vehemente & insupportable, y fauldroit donner ordre en chageant les maturatifs en plus doux, pour le dangier de l'inflammation: mesmes si la tumeur se tourne en couleur brune, violette, perse, noirastre, ou verde.

Et afin que les parties prochaines & voisines n'en soyent offensées ou corrompues, sera fort bõ appliquer tout au tour de la tumeur vn emplastre ou cataplasme faict de bole d'armenie, dict communement bolarmeni, meslé avec eaue rose, vinaigre rosat & blanc d'œuf, le tout bien agité & brouillé ensemble. Autres aides pour ce faict s'expliqueront lors que nous parlerons des charbons.

*Remedes & moyens pour percer, ouurir
& rompre l'apostume pestilen-
te, estant meure.*

Q Vand par les susdictz remedes maturatifz biē appliquez, & en temps on void la bosse ou tumeur pestilente estre preste à percer & ouurir (qui se cognoist quād la douleur esclanceant est remise, & l'apostume obeit au doigt) aucuns y besoignēt lors avec la lancette. Qui est vn peu dangereux, mesmes aux glandes qui reçoient la diuision des grādz vaisseaux, veines & arteres: comme aussi en autres lieux, de peur de toucher & naurer quelque tendon, ligament, nerf, artere ou veine. Ce qui gist en la dexterité & sçauoir du barbier ou chirurgien expert en son art. Si par le coup de ladicte lancette, sang seulement ou boue sanguinolente prêt
issuc

issue, ne s'en fault soulcier, & en tirer bien peu la premiere fois, iacoit que toute la matiere contenue en l'apostume ne vaille rien. Car nature ne soustient violentes ou soubdaines & grandes vacuatiōs. Et si par fortune il aduenoit que du susdict coup de lancette, ou autremēt, suruint vne grande effusion de sang (comme il se void aduenir aux bosses que plusieurs percent & decouppent deuant qu'estre meures) il faudroit retenir & supprimer ledict sang par l'application d'un emplastre faict de parties egales d'aloē & encēs puluerisez & incorporez avec vn blanc d'œuf & poil de lieure. Et lors que la fluxiō sera arrestée, conuiendra appliquer sur la tumeur, bosse ou apostume vn des cataplasmes maturatifz lesquelz nous auons n'agueres proposez: puis

procceder comme cy apres nous dirons.

Plusieurs s'aident pour l'ouuerture des susdictes apostumes ou bosses de cauterres qu'ilz appellent actuelz, ou bien potentielz, desquelz nous parlerons, Dieu aidant, au discours des charbons pestilétielz. Ce temps pendant ie proposeray remedes les plus faciles qu'il me sera possible, pour faire percer & ouurir de soy mesmes & sans aucuns ferremetz ou cauterres lesdictes bosses pestilètes, apres leur maturation, ou deuant, si besoing est.

Moyens tresfaciles de percer & ouurir toutes apostumes sans aucun ferrement ou cautere.

POurautant que plusieurs craignēt le coup de lancette, ou feu du cautere actuel, ou bien la douleur extreme du potentiel, ie donneray icy faciles

ciles moyēs pour faire percer de soy
mesmes toute apostume pestilente,
ou autre.

Si c'est pour ieunes enfanz ou corps
douilletz, on fera seulement cataplas
me d'un moyeu d'œuf delayé & dis
sout avec peu de sel broyé. Lequel
s'appliquera chaud avec estoupes
ou linge blanc sur la bosse, & sera re
nouuelé d'heure en heure. Si cela ne
suffit, on pilera l'herbe nommée sca
bieuse, & meslera avec vieil sein de
porceau, & le tout bien chaud sera
appliqué cōme dessus. Et vous fault
estre asseurez qu'il n'y a plante qui
aye effect plus miraculeux contre la
peste & charbō que ladicte scabieuse
prise & appliquée en toutes les for
tes qu'on voudra. Ce qui est experi
mēté non du iourd'huy, ains de tou
te antiquité.

Pour ceux qui ne sont si ieunes que les precedentz, & sont vn peu plus fortz, vous vſerez du cataplaſme ſuiuant,

Pre nez	{	de la ſcabieufe	{	de chac. dem. poign.
		& fucilles d'o-		
		zeille.—		
		le iaulne d'vn œuf.		
	{	ſein vieil de pourceau, i. onc.		

Du tout bien pilé & broié ſoit fait cataplaſme, lequel eſtât bien chaud ſera appliqué, comme dict eſt.

Si le patient eſt ſans grãde fiebure, & la boſſe ou tumeur eſt loing des emunctoires des parties les plus nobles du corps, ſera tresbõ vſer de ruptoires vn peu plus forts: cõme pourroit eſtre ceſtuy cy cõpoſé de figues graſſes, oignon de liz, vieil leuain, & ſein de pourceau eſtant ſalé. Et ſera le tout enſemblément pilé, puis bien

bien chauld appliqué avec vn linge sur l'apostume ou bosse. Mais ne faut soublier mettre au milieu du cataplasme vn bien peu de pouldre de cantharides, ou bien au lieu qui respondra à la partie ou se voudra percer l'apostume. Si n'avez cātharides, vous ferez pouldre de la fiète seiche d'oyes, pigeons, ou moineaux: & en vserez comme dict est.

Pour ceux qui sont accoustumez à trauail assidu, & ont pour ceste cause le cuir dense & espois, comme crocheteurs, mariniers, vigneron, chartiers, laboureurs, mareschaux, gédarmes & autres, fauldra vser de cataplasmes ou emplastres aperitifz beaucoup plus vehemens: comme cestuy cy.

Q

	{	chaux viue—demye onc.
		faon mollet—i. onc.
Prenez		vieil leuain—ii. onc.
		fel gemmé—iii. drach.
	{	sein de porc vieil—i. onc.

Du tout broyé & ensemble incorporé sera faicte masse, de laquelle on prédra le gros d'une petite auelaine, ou moins selon le corps de l'apostume, & sera mis au milieu de l'emplastre maturatif ou cataplasme, ainsi que dessus a esté monstre. C'est chose fort experimentée. Mais ne faut oublier faire ouuerture la plus grande & ample qu'on pourra.

Autrement on pourroit broyer avecques huile de liz, cátharides ou fiente d'oye ou pigeons, y adioustât peu de terebinthine, & en vser cōme dict est.

Aucūns sont d'aduis qu'il est beaucoup

coup plus expedient & meilleur ou-
rir l'apostume pestilente deuât qu'elle
soit meure qu'autrement. Qui n'est
sans raison, pour les causes alleguées
en nostre opuscul Latin.

Aduertissement.

Mais voirement s'il aduenoit que
par l'application des susdictz reme-
des maturatifz & aperitifz la tumeur
ou bosse deuint plus rebelle avecq'
augmentation de douleurs, pour la
qualité de son venin, & que l'hu-
meur pestilent pour ceste cause re-
print sa course & voye dedans le
corps, comme souuēt i'ay veu adue-
nir, que fauldra il faire? Sera tresbon
vser des remedes & moyens reuoca-
tifs, & attractifz desquelz nous auons
parlé cy dessus: & au dessoubz des ca-
taplasmes ou autres aydes, appliquer
l'emplastre tant loué & approuué de

Galien, qui se faiët ainsi.

Prenez { de plantain, — ii. poign.
 farine de lentilles, — i. onc.
 pain de son. — vi. onc.

Le tout soit cuit en bon vinaigre, puis pilé, meslé, & sans aucune chaleur appliqué autour de l'apostume pestilente : ainsi que dict est. Autres aides pour le mesme faiët s'escriront quand nous guarirons les charbons.

Ie ne suis ignorant que toutes pestes ou bosses sont cōmunement accompagnées d'autres maladies & incōuenientz, Desquelles si ie vouloye escrire bien au lōg, me cōuiendrait en faire vn liure expres, comm'aussi des mondificatifz, deterisifz, & incarnatifz desdictes bosses & apostumes, le tout amplement traicté en nostre liure Latin. Nous en pourrons toutesfois icy, comm'en passant, toucher
 vn pe-

vn petit mot, car la chose est de consequence, & pour auoir esté negligée venue en grand peril.

*Remedes mondificatifz, incarnatifz
& autres.*

Doncques apres que vous aurez congneu la suppuration & vacation de voz bosses pestilentes auoir esté faicte comme il appartient, il vous fauldra mōdifier & nettoyer l'vlcere & cauité par charpies ou tentes plongées en la decoction de miel rosat, & ius d'ache, plantain ou alüine. Et par dessus appliquer vn emplastre faict de terebinthine fondue & meslée avec miel & farine d'orge. Vous cōgnoistrez l'vlcere estre mōdifié, par sa rougeur n'estant trop seiche, ne trop humide.

S'il est caué & profond, il sera incarné, ou si voulez répli de chair par

vn onguët fait de terebinthine avec miel rofat, farine d'orge, encens, myrre & sarcocolle.

S'il demeure quelque rougeur au tour ou quelque autre couleur accompagnée de pustules ou taches, comme souuent il aduient, le tout se departira y applicant huile rofat avec bole d'Armenie, ou caue de plâtain & morelle avec lediët bole. Aucuns pource mesme faiët vsent de scarification, qui n'est à vituperer, car elle tire le mauuais sang. Il seroit beaucoup meilleur de corneter la partie, qui auroit le moyen.

Si lediët vlcere contient quelque noireur ou mortificatiõ qui ne bouge & ne gaigne pays, fauldra prendre de l'onguent nômé Basilicon & d'un autre appellé Aegyptiacon, plus du premier, moins du second. Au contraire,

traire , si la noirceur & pourriture s'augmēte, croist & s'auance, fauldra plus du second & moins du premier. Si cela ne suffit, sera fort bon brusler la chair morte , & oindre l'escare ou crouste de beurre fraiz, puis incarner comme dict est.

Voila ce que ie veulx presentemēt escrire pour la curation des apostumes & bosses pestilentes . Lesquelles ne faut oublier tenir long temps ouuertes, & le plus que faire se pourra: selon aucuns iusques à trois moys, si gnamment celles qui n'ont suffisamment suppuré. Autrement faudroit vser de purgations & medicamens.

Des charbons pestilentielsz.

QVand nous auons cy deuāt montré la curation des tumeurs & bosses pestilētielles, nous auons d'un mesme traict de plume expedié la

methode, les remedes & progres de la curation des charbons, quāt à leur regime, medicamens, seignée, ventoufes, maturatifz, aperitifz, mondificatifz, incarnatifz & autres aydes. Toutesfois pour esplucher vn peu d'auantage la matiere ie lascheray la bride à ma plume, & delaissant l'essence avec les causes & generation des charbōs pestilentielz, ie monstrey brieuement quelz d'entre eulx sont mortelz, & quelz peu dangereux.

Signes des charbons mortelz, & de ceux qui sont peu dangereux.

QVād le charbon apres s'estre manifesté & produit, incontinent se retire & esuanouist sans aucune allegeance du malade, c'est signe mortel. Mais si soudain il sort, & le malade se sent soulagé, c'est bon signe.

Tant plus il sera loing de parties nobles,

nobles, & signâment du cuer, moins sera il perilleux.

S'il se produict sur la region du cuer, estomach, foye ou gosier, c'est chose moult suspecte & dangereuse.

S'il est loing du cuer, ayant couleur rouge, n'est signe trop mauuais: avec perse, perilleux: avec noire, mortel & deploré.

S'il est acompagné de pourpre par tout le corps, avec debilitations & foibleesses, fault recommander le pauvre patient aux prebstres & fossoieurs.

Autres signes se pourront tirer de ceulx que nous auôs proposez au commencement de ce second liure, & autres meslez par cy, par la. Car à dire verité, la bosse & charbon sont comme cousins germains, & ne vont gueres l'un sans l'autre.

Briefue curation du charbon pestilentiel.

I' Ay tousiours esté d'aduis qu'il faut commencer la curation des charbõs pestilètiels par doux remedes & non violentz: qui les rendent communement rebelles, & par fois incurables: dont s'en ensuiuent infinis inconueniens. Quelques vns ont esté si forts & constans, qu'ilz les ont decoupez ou faiët decoupper autāt menü que chair à pasté. Les autres les ont cernez ou pinsez & tenallez de ferremēs ardāts, afin de dōner issue au gros sang pestilent, duquel ilz sont engendrez. Ce faiët ilz ont laué les decouppeures d'eauē salée avec huile, afin que ledit sang ne se caillast ou figeast: ou si ia il estoit, qu'il fust dissoult, & se peult escouler. En apres ilz ont appliqué remedes refrigeratifz tout autour, telz que nous les auons enseignez, & en mōstrerons cy apres, Dieu aidant.

aidât. Ceulx qui ne peuuent souffrir leur douillette chair estre ainsi offensée & cicatrizede, ayment beaucoup mieulx vser de ventouses en la façon que nous auons dict. Les autres craignás le feu, ont plus cher vser de cauterie potentiel (tel que sçauent faire les barbiers ou chirurgiēs, & en auós descript quelques vns au parauant) que de celuy qu'on nomme aétuel, portant son feu ardât avec soy, en or, argent, ou fer, ainsi que lesdictz barbiers & chirurgiēs ont coustume faire. Lors que le charbon sera ouuert, il sera tresbõ appliquer tout au tour vn blác d'œuf fort agité & batu avec huile rofat. Ou bien fáyder d'aucun des remedes proposez cy dessusquád nous parlions de preseruer de mortification, corruption & contagion les lieux proches de la bosse ou tu-

meur pestilent. Entre autres sera tresvtil l'vnguēt de Galien descript au dict lieu. Si voulez prendre la miette d'un pain venant du four, & la tremper en caue de plantain, ou laiētues, puis l'appliquer, cōme il est dict, sera tresbon. S'il fault oster l'escare ou crouste faicte par les susdictz ferremens, ou bien qu'elle tombe de soy mesmes, il sera proufitable appliquer sur le lieu biē peu de l'onguēt fait de beurre fraiz avec farine de fromēt & vn moyeu d'œuf. Puis vser de mūdicatifz & incarnatifz, cōme dit est.

Qui voudra essayer de faire venir le charbon à maturité & suppuration, fault qu'il y procede, ainsi que nous auons escript, par aides du commencement fort doulces, de peur de gaster tout, & rendre la matiere charbonniere de folle enragée, qui autrement

ment est fort rebelle & obstinée, plus tost se tournant en corruption que maturatiõ. Si toutefois on la voyoit estre preparée à suppuration, faudroit vser de ruptoires telz que nous auons dict. Semblablement d'aides qui puissent defendre les parties prochaines d'inflammation, corruption & contagion, comme pourroit estre ceste cy experimētée de long temps. Fault prēdre vne pomme de grenate qui soit aigrette, laquelle estant mise par petites pieces, sera cuitte en vinaigre rosat par si lōg temps qu'elle soit cōme pourrie. Ce faict il conuiēdra la tant broier qu'elle represente forme d'onguent, lequel faudra estendre sur vn bon linge & l'appliquer autour du charbon: mais en telle sorte qu'il ne touche sur iceluy. Quand ledict vnguent sera sec, le faudra re-

moitir avec vinaigre, & proceder à la curatiõ de l'vlcere cõme nous auons escript pour les bosses & apostumes pestilentes. *Aduertissement.*

I'Estoye en deliberation de donner fin au petit discours de la curation des charbons pestilentiels, n'eust esté qu'aucuns de mes amis doctes & experts en toute medecine, apres auoir eu communication de nostre present labour, m'ont prié de briefue-ment & facilement icy vouloir descrire & expliquer qu'elle chose est vn vray charbon pestilentiel. Pourau- tant qu'en temps de peste plusieurs personnages de marque & honneur, mais peu asseurez & fort timides, ont souuẽt fois prins quelques pustules, rõgnes, escorcheures ou petits cloux naturelz pour charbõs pestilentiels: & en ont conceu telle oppinion sans
iamais

iamais les en pouuoir detourner, qu'ilz en sont mortz. Pour donc ob- uier à telles impresfions, ie donneray icy les signes, marques, & vraye de- scription du charbon pestilétiel, afin que nul y soit trôpé cy apres. Ce que ie debuois auoir faiët au commence- ment de ce discours charbonnier.

Quelle chose est charbon pestilentiel.

CHarbon pestilentiel n'est autre chose qu'une petite pustule quel que fois de couleur rouge, autrefois brune, violette, perse, plombée ou noiratre : laquelle bruste, enflambe & corrópt tout ce qui est à l'entour de soy, molestant l'homme de dou- leur nonpareille, & ayant en circuit comme petites veines qui represen- tent la couleur de l'arc au ciel. La grá- deur de luy n'excede communemēt la quātité d'une lētille, ou teste d'es- pingle: se presentant de premiere fa-

ce cōme vne petite pustule, bien sou-
 uent acōpagnée de plusieurs menüz
 grains comme de mil: qui puis se ras-
 semblent soubz telle couleur que
 nous auons dict, mais le plus souuēt
 rouge & fort enflambée, avec vne pe-
 tite escare ou crouste, qui puis s'ulce-
 re, & brusle plus que feu ardent. Qui
 fait que les Grecs l'ont bien nommé
 Anthrax, comme aussi aucuns Fran-
 çois qui l'appellent Anthrac, chan-
 geans seulement la dernière lettre: &
 les autres charbon, tournans le Grec
 en vulgaire François. Qui est tout ce
 que presentement i'en puis escrire,
 remettāt le surplus au discours de no-
 stre liure Latin.

*Conclusion de l'Auteur, & de
 son présent opuscul.*

Iusques icy nous auons, par la gra-
 ce de Dieu, tellement quellement
 conduit

conduict nostre discours des secretz & aides contre la peste. Reste y mettre fin & prier l'indicible bonté dudit Seigneur m'auoir fait la grace d'auoir peu & escrire chose qui soit à sa louange, & redunde au proufit de la Republique, avec vn contentement des bons & doctes espritz. Lesquelz ie prie ne trouuer estrange ne indecent si le present opusculc est imprimé de lettre grosse & populaire. Car ie l'ay ainsi permis, afin qu'un chacun le peult aisément lire, & en tirer quelque proufit : signâment les simples artisans & gës rustiques, soiët hōmes ou fēmes, pauvres ou riches: qui n'ōt acoustumé lire en petite forme de lettres, ainsi que i'ay veu. Dieu par sa sainte grace vueille qu'ilz s'en puissent bien ayder, & secourir leur prochain. Voila le but de mō desir.

*EXTRACT DE PLV-
sieurs remedes tresfaciles & assurez
contre la peste: qui ont esté en plusieurs
pays fort heureusement experimentez.
Le tout proposé par ledict M. Ant.
Mizauld.*

DE me suis icy aduisé de contenter au-
cuns curieux, qui demandent s'il n'ya
moyens de guarir peste, bosse & char-
bon par breuages, applications, ou
autres aides, sans tant longues escriptures & dis-
cours. Je respons que plusieurs experiéces tous
les iours se voient & confirment en gens dispo-
z & preparez.

Du temps de Galien vne grande peste suruint
à Romme, non moindre que celle qui fust à A-
thenes descrite par Thucidide: durant laquel-
le furent guariz par le conseil dudit Galien, tous
ceux qui beurent au commencement de leur mal
du vray bole d'Armenie, ou si voulez boliarme-
ni. Duquel fault prendre le pois de deux escuz
auec bon vin blanc & fort subtil: y adioustant
eae de buglosse ou de roses, s'il y auoit grosse
siebure.

Auicenne premier entre les medecins Arabes,
pour ce mesme effect donne auec vne once de

CONTRE LA PESTE.

bon vin blanc ou claret & deux onces d'eau rose, vne drachme du vray bole d'Armenie. Ceux qui retiennent ceste potion, guarissent: & ceux qui la vomissent, en doibuent prendre iusques à trois ou quatre fois le iour, loing du repas, mais en moindre quantité. Et fault que soit au commencement de la maladie.

Les medecins Grecz & aussi Arabes en attribuent autāt au vray & legitime theriaque, prins toutesfois en petite quantité, & avec semblables liqueurs que dessus. Ce que par plusieurs fois a esté experimenté.

Aucuns en Gascongne ont prins de groz oignons, & les ayant bien vuidez, ont remply de fueilles de rue & bon theriaque ou mithridat, puis faict cuire soubz cendres chaudes, ou (qui est meilleur) soubz vn pot neuf, couuert desdictes cendres, puis ont chauldemēt appliqué le dict oignon ainsi farcy, sur le lieu de la peste: avec changement de fix en six heures.

D'autres au pays de Poitou, ont prins quelques fueilles de plantain, d'armoise & de verbenne: lesquelles ilz ont pilées avec vin blanc: puis passées par vn linge, & beu avec peu de mithridat: se pourmenant en apres d'un costé & d'autre, iusques à suer, ou vomir.

I'ay veu vser en Picardie du ius de fueilles de foulcie, de chardon benist, de plantain & perueche avec peu de vin blanc, & bon theriaque, d'ont peu estoient qui ne guarissent.

SECOVRS ET AIDES

Aucuns au mesme pays ont pilé scabieuse & passé avec eue rose & vin blanc, y adioustant le gros d'un pois de bon theriaque: & filz vomissoient, en reprenoient d'autre, sans dormir douze heures apres.

Les Normans, ainsi que j'ay entendu de leurs medecins, meslēt avec deux doigts de moustarde, demy voirre de vin blanc, & le groz d'une febue de theriaque ou mithridat: puis l'ayāt beu se font suer sans dormir, & se relieuent à demy guariz. Ne fault oublier que tous ces remedes se doibuent prendre au commencement de la maladie.

Par la relation d'un docte medecin j'ay entendu que plusieurs au pays de Limosin, prennent ius d'esclaire & de mauues tirez avec vinaigre: lequel ilz boient avec huille de vieilles noix, puis se pourmeinent longuement sans dormir, & iettent la matiere pestilente par vomissemēt & selles. *Qui est chose plus que veritable.*

Les Auvergnatz, cōme j'ay aussi entendu d'aucuns, boient enuiron trois doigts de leur vrine, avec le pois d'un escu de bon mithridat. Et en semblables choses trempent un linge, lequel ilz appliquent fort chaud sur la peste, & festantz bien pourmenez se couchent, suent, & sont guariz. Sinon, ilz recommencēt: comm'il fault faire de tous autres remedes precedentz & suiuantz.

Vn medecin d'Auignon m'a recité quelque fois, que pardela ilz pilent aux, rue & esclaire

CONTRE LA PESTE.

avec vin blanc, & boiuet l'expressiõ acompa-
gnée d'eau de vie, mesmes les rustiques & la-
boueurs, qui ne laissent pource d'aller à leurs af-
faires.

Plusieurs ont esté guaris à Rouen avec vne op-
piate faicte de bon theriaque, mithridat, vinaï-
gre, ius de bistorte, de tous esgalement, avec peu
de safran. Et s'en prenoit deux drachmes avec
bõ vin blâc, puis on se pourmenoît, & s'il estoit
possible suoit.

Quelque singulier medecin m'a pareillement
affirmé auoir veu plusieurs estre guariz en Italie
par vne oppiate faicte de deux drachmes d'E-
phorbe, & demye once de mastich, le tout amas-
sé & incorporé avec ius de citron, limon, orége,
ou ozeille. Et en fault prendre deux drachmes
avec eau de pimpenelle, ou chardon beneist.

En Prouence vsent de pouldre de semence de
citrons & de racine d'angelique, avec vin blâc,
ou ius de limons: quelques fois avec eau d'o-
zeille, de buglosse, ou plantain en esté.

J'ay entendu d'un honorable gentil'homme
des ordõnances du Roy, qu'il a veu vser au pays
d'Artois à gentz pestiferez, de godalle ou biere
avec beurre fraiz, theriaque & ius de rue, le tout
estant tiede: & en guerissoient la plus part, avec
grandes vacuations tant par hault qu'à bas.

En ceste ville de Paris l'an passé plusieurs fu-
rent guariz vsantz de la decoctiõ de fucilles de
soulcie, plâtain, cichorée, & ozeille le tout mes-

lé avec vin blanc, peu de theriaque, bon bole & deux brins de safran : estant le tout prins à ieun, sans dormir douze heures apres, ains se pourmener iusques à suer, puis se mettre dedans le liêt, & derechef suer, si faire se pouuoit. C'est chose bien experimentée.

Ceste presente année à saint Germain en Laye pres Poissy plusieurs ont esté sauuez & guariz prenâtz la decoction de geneſtz verdz faicte en bon vin blanc. Ou bien l'expresſion deſdictz geneſtz broiez & pilez avec ledict vin iusques à dissolution. Aucuns y ont adiousté peu de mithridat, les autres ius de rue, ou oignons, ou de peruerenche, qui y est fort singuliere.

Quelques rustiques ont vsé de seule mouſtarde, qui les a prouoquez à suer extremément en leur liêt, duquel il ſont releuez à demy guarys: Les autres y ont adiousté theriaque, & ſ'en ſôt mieulx trouuez.

Je me ſouuiés que l'an 1545. apres les guerres en Champaigne, & aproches de l'Empereur Charles le quint vers Paris, vne grande peste visita ledict Paris, & lieux voiſins: Pour laquelle euitier ie m'eſtois retiré à vn village nommé Arcueil aſſez pres dudiêt Paris. Auquel lieu reſidant, plusieurs par mon cōſeil furēt guariz prenâtz de la grâde ozeille des prez, nōmée d'aucūs patience, ou l'apparance: & apres qu'elle auoit trempé en fort vinaigre avec rue, la faiſant cuire ſoubz les cendres chaudes dedans vn papier,

puis

CONTRE LA PESTE.

puis la pilât avec vin blanc en beuuoiet le ius avec vn peu de theriaque: continuant cela soir & matin. S'il y auoit bosse ie faisois fricasser le mag avec vieil sein de pourceau, & l'appliquer avec laine sur ladicte bosse. Dequoy en furent guariz infiniz, desquelz aucuns viuent encores, & en font leur proufit. Mais fault que telles choses se facent du commencement.

Au pays du Maine, ainsi que plusieurs ont escript & verbalement ie l'ay ouy, beaucoup de pestiferez ont recouert santé par le moyen & aide d'une herbe nommée lysimachia, pilée & appliquée soubz la bosse & selon aucuns dessus: l'attirât tousiours & chassant vers soy. Parquoy ilz l'ot appelée chassebosse. Nous auôs attribué vertu presque sèblable à la scabieuse, & autres.

Ie ne veulx icy omettre le secret & miracle populaire de feu Maistre Iean Thibauld, qui faisoit descendre & venir la peste & bosse ou bon luy sembloit. Il prenoit vne racine, ou si elle estoit trop petite deux, d'une herbe qui croist aux prez & se nomme bassinetz: laquelle estant bien pilée & peu chauffée, il faisoit mettre sur le poulce de la main du costé ou estoit la bosse, si elle estoit aux parties haultes par dessus le nombril: ou du pied, si c'estoit depuis ledict nombril en bas, & la laissoit 24. heures ou moins. Audict lieu se faisoit vlcere, ampouille, ou vessie, par laquelle (estant ouuerte) la matiere pestilente descendoit & deschargeoit la bosse & apostume,

SECOVRS ET AIDES

dont ensuiuoit à plusieurs guarison: voila le miracle dudit maistre Iean Thibauld, Mais il ne sceut guarir le feu ou l'inflammation qu'il auoit par ce moyen causée sur le gros artel d'une belle, ieune & douillette Damoiselle pestiferée demurant pres de luy. A laquelle ie fiz appliquer vn petit vnguent d'un moieu d'œuf, beurre fraiz & aloë lauë en eau rose, dont elle en fut guarie, & m'en a depuis remercié plusieurs fois. A ceste cause ie conseilleray à ceux qui voudront vsfer de ladicte racine ou fucilles, & auront le cuir delicat, l'enueloper entre deux linges, puis l'appliquer, & laisser lōg temps l'vlcere ouuert, qui se guarira par l'onguent susdict. Plusieurs autres racines, herbes & escorces font mesme effect, entre autres l'escorce de la plante nommée pour ceste cause flambe, & celle de la seconde espece de Clematis: desquelles vsent les gueux de l'hostiere, pour faire vlcérer leurs bras ou iâbes. Brief toutes choses caustiques en font autant. Desquelles nous auons parlé & escript cy dessus. Autres remedes bien asseurez & experimentez, se trouuerōt par cy par là en ce present opusculè, afin que ie ne sois trop prolixè. Ie prie le Lecteur prendre en gré nostre present labeur, & en faire son proufit.

FIN DES SECRESTZ ET AIDES
contre la peste, proposez par M. Antoine
Mizauld Medecin à Paris.